



Original Scholzenbrief

1/4

1/4

F 4
V

Die Sieben psalmen mit

deutscher auslegung nach dem schrifftlichen
synne zu Christi vñ gottis gnaden/neben
: seyns selben. ware erkentnis. gründlich
gerichtet.

1517.

[Faint, mostly illegible text from the reverse side of the page, appearing as bleed-through.]

D Martin Lutheri libros ubi ueritas in ueritate
is scito ueram eos doctrina propo
nere et docere. congruenti Prophe
tus et Apostolis et omnibus
miraculis sacrae scripturae



¶ Allen lieben gliedmaßen Christi die dis
Puchleyn lesen.

Gnade vñ frid von gott/dass nit ymand wunder habe/
lieben frunde Christi. vō dem text. diser sieben psalmen/
Ist zu wissen/dass derselb. yn etlichen versen. vmb klerer
vorstands willen/vber die gemeynen translation/nach
der trāslation sancti Hieronymi genomen ist/ auch dar
zu beholffen die trāslation doctoris Joannis Reuchlin
yn seyner hebreischer septene.

Die gloße aber vñnd auflegung/wie wol/sie vvilleicht
new. adder auch nit schrifflich synnes ynhaltend/von
etlichen/mag angesehen werdē. hatt es myr doch nit ges
zymet. so nyder die Christen zu achten/adder zweyfelden/
das Christus also nah bey yhn sey. er werde yhn woll sas
gen / wie sie das alles richten sollen/ Meyne vormessens
heyt aber / die psalmen auß zulegen sūnderlich yns deuts
sche. Befil ich frey/yn eyns iglichen gutduncken zu vrtey
len/dann nit myr nach dyr sūndern gote alleyn lob vñd
eere an ende. Amen.

S. Martinus Luder Augustiner
zu Wittenberg.

Der Erste psalm an der Zahl der sechste.

- 1 . Ach gott straff mich nit yn deynem zorne
vnd castey mich nit yn deinem grymme
- 2 Ach gott erbarm dich mein/dan alle mein gebeyne
erschrocken seyn.
- 3 Vnd meyn seel seer erschrocken ist
aber o gott wie lange?
- 4 Ach got keer erwidere/vnd erlose meine seel
mach mich selig vmb deiner barmhertigkeit willen.
- 5 Dan yn dem tode ist niemant der deiner gedencet
aber yn der helle wehr wirt dir lob vñ danck sagen
- 6 Ich byn geengstet yn meinem suffzen/ich will alle
nechte waschen meyn bett/vnd mit meinen threnen
begissen mein lager.
- 7 Meyn angesicht ist ganz vorwustet vor grym/
ich byn voraldet vnder den die alle mein feinde synd
- 8 Weychet von myr alle/die yr do wircket das nit
recht ist/dan gott hat erhoret das geschrey meines
weynen.
- 9 Got erhoret hat mein gebeet
got hat auffgenommen mein bitten
- 10 Ach das sich schemeten vñ seer erschrocken wurden
all mein feynde/das sie widerkeret wurden vnd seer
schnel zu schanden wurden.

¶ Zu vorderen disen psalmen/seynd zu
mercken etliche punctlein.

Das erst. In allem leyden vñ anfechtüg/sal der mēsch zu
aller ersten zu got lauffen/vñ erkennen vñ auffnehmen als
von got zugeschickt werde/es kom von teuffel ader von
mēschen. Also thut hie der pphcet. der yn diesem psalme

24

nennet seynn feynd/aber zum ersten leufft er zu gott. vnd
nympt die feindschafft seynes feynd/nit von yhn / sunder
von got an/dan mit der weise lernet sich die gedult vnd
forcht gottis/ Wer aber den menschen anseheth vn̄ nit v̄
gott an nimpt/wirt vngedultig vn̄ gottis vorachter zc.

Das ander. Gott strafft ym zweyerley weise. Ein
mal/yn gnaden als ein gutiger vater vnd zeitlich. Das
ander mal/yn zorn als ein gestrenger richter / vnd ewig.
Wan nu gott den menschen angriffet/so ist die natur so
schwach vnd vorzagt/darüb das sie nit weiß/ab got auß
zorn adder gnaden sie angreiffet/vnd ym der forcht des
zorns/hebet sie an vnd schreyet. Ach gott straff mich nit
ym zorn/las yn gnaden sein/vnd zeitlich/ sey vater vnd
nit richter / als auch sanct Augustin spricht. Ach gott
Borne hie/hawe hie/ schlag hie/ vnd schon vns her dort.
So bittet er nu hie/nit das er ganz vngestraft sein wolt/
dan das wehr nit ein gut zeichen/sunder als ein kind vor
vater gestraft wirdt. Das aber diese wort/von einem
sunder gesprochen werden/ader doch yn der sunder pson
durch Christū/folget darauf /das ehr die straffe nennet/
dann gottis straff ist nit vmb gerechtikeyt willen/dar
umb müssen alle heyligen vnd christen/sich sunder erkens
nen/vn̄ gottis gericht fürchten/dan̄ diser psalm allen ges
mein ist vn̄ niemant außzeugt/darumb wee allen denen
die sich nit fürchten vnd yre sunde nit fulen vnd sicher
eynher gehen/gegen dem forchtsamen gericht gottis/vor
wilchem doch kein gut werck gnugsam sey kan.

2 Erbarm dich meyn/

Das ist erzeyg myr gnad/das ich yn der angst vn̄ forche
nit vorgehe/ader vorzage.

Mach mich gesund.

Das ist/stercke mich/thu myr hilff/yn diesem elend.

Dan̄ all meyn gebeyne erschrocken seynd.

Das ist all meyne sterck vñ crafft. erligt vor dem grauent
deiner straff. darüb die weil meyn sterck mich vorlest. so
gib myr deine stercke. Vnd ist hie zu mercken. das disser
psalm/vnnd seyns gleychen nymer mehr wirt grundlich
vorstäden ader gebett. es gehe dan dez mēschen der anfal
vnder die augen. als dan geschicht. ym sterben vñ letzten
hynsaren. vñ selig die. den das. ym leben widderferet. dan
es mus zu eynez vndergäg kumen/mit einē iglichen mē
schen. Wan nun d mēsch also vndergehet. vñ zu nichte
wirt yn allen seynen crefftē/wercken/wesen/das nit mehr
dann eyn elender/vordampfer/vorlasner sunder da ist.
dan komet die gotlich hilff vñ sterck. also Job. xi. Wen
du meynst das du vorschlungen seyst. erst so wirstu ers
für brechen wie der morgenstern.

3 Vnd meyn seel ist seer erschrocken.

Dan gottis stercke vñ trost wirt niemād gegeben. er erbitte
es dan mit ganzes grūd des hertzen. Niemand bittet aber
grūdlich d noch nit grūdlich erschrockē vñ vorlasen ist
dā er weys nicht was ym gebüst. vñ steet. die weyl. sicher
yn anderer stercke vñ trost. seynselb. adder der creaturen/
darumb das got müge seyne crafft vnd trost aufgeben/
vnd vns mitteylen. so zeucht er hyn allen andern trost/
vnd macht die sele hertzlich betruht. schreyend vñ sehend
nach seinem trost. Vnnd also seyn alle gottis straffe gar
fruntlich geordnet zu seliger trostüg/wie wol die vnwey
sen die ordnung an yhn selbs vorhyndern vnnd vorkeren
durch yre weyche vnd vorzagende hertzen. an gott. dar
umb dass sie nit wisen das got seine gute vñ fruntschafft
vnder dem zorn vñ straff vorborgen hatt vñ gibt.

Aber/ach gott/wie lange.
Allen leydenden menschen ist die weyl lang. vñ widerüb
kurg den frolichen/sunderlich aber vnd vnmeslich lang
ist sie den/die disen innwendigen schmerzen der seel has
ben der vō gottis vorlasen vñ entsagen gesulet wirt/als

Aij

man woll spricht. das eyn stünd des segferors bitterer sey/
dann tausent jar tzeytlicher leyplicher peyn. Also ist nit
großer leyd/wan empfindlich leyden des gewissen/ das
do geschicht/wan gott entsaget. das ist. die warheyt/ ges
rechtikeyt/weysheyt zc. vñ bleybt da nichts/ dan funde/
finsternis/ach vnd wehe. vnd dis ist ein tropff ader vor
schmack der hellischen peyn vñ ewiger vordammis/dar
umb ersucht sie. alle gebeyn/crafft/safft. marck vnd was
ym menschen ist.

4 Ach gott keer erwidder/vnd erlose meyn seel.

Abekeren gottis/das ist innewendig entsagen/ vorlassen/
dauon das greulich erschrecken/vnd gleich ein anheben
vordammis. empfunden wirt/ als im. 29. ps. Du hast
deyn antlitz von myr keert/vnd ich byn erschrocken.
Widerkeeren aber ist innewendiger trost vñ enthaltung/
ynn frolicher hoffnung. darumb spricht er/ erlose meyn
seel/also sprech ehr/sie ist vor suncken vñ verdānet/ zeuch
ader reyß sie widder erauf.

Mach mich selig ader gesund.

Dan dis ist die tieffeste vñ groste krächeyt der seelen/dar
ynne sie müst ewiglich vorterbē/wen sie bliben also solte

Vmb deiner barmhertzigkeyt willen/

Nit vmb meiner vordinst wirdikeyt willen/sunder dein
barmhertzigkeyt/auff das die selbe gepreyset gelibt vnd ges
lobt werd. das du sie auch den vnwürdigen zu hilff lest
kūmen. Dan wilchem got hilfft nach seym vordinst der
wirt billicher geert vñ preysset. dan gottis barmhertzigkeyt/
das weer ein hoche schmacheyt. darūb soll gottis barm
hertzigkeyt gepreyset werden/so musen alle vordinst vnd
würden zu nichte werden/ vñ das thut dise vorsuchūge.

5 Dan yn dem tode ist niemant der deyn gedencf.
Das ist/die todtē lobē dich nit. nach preysen dein barm
hertzigkeyt nit/sunder allein die lebendige. als im. i. xij. ps

Nicht die toden werden dich loben. auch nit. alle die yn die helle faren / sinder wyr die wyr lebendig seyn. gebenedeyen got. nu vn ewidlich / darumb so redet er hie nit vō leylichem tode. sund mehr vō dem geistlichē tode. als die seel tod ist / dā sund ist der seelen tod. peyn aber ist yhr hell. Alle beyde empfindet wer yn disem jamer ligt. sund vnd straff der sund. darumb spricht er / laß mich yn dem tode vn d hel mit / sund nach deiner barmhertzigkeit mach mich lebendig mit gnaden / vn erlose mich vō der helle / mit troste / darüb gibt diser vers zu vorsteen / das dises leyden sey ein pforte vn eyngang yn die ewigen sund vnd straff. das ist yn den tode vn helle. als d kunig Ezechias sprach. Ich hab gesagt mit grossem schrecken / ich muß faren yn die hellischen pforten / mitten yn meynem leben / das ist. do ich meynt am aller besten leben.

In der hell aber / wer wirt dyr lob vn danck sagen /

Darumb hab ich gesagt / vmb deiner barmhertzigkeit willen. dan die hell. dā eyn barmhertzigkeit nit ist lobet dich nit. ja mehr. schmecht vnd lestert dein gerechtikeyt vnd warheyt. Dis ist der aller edelst gedanken den die heyligen yn yrem leyden habē. da mit sie auch erhalde werde / sunst seyn sie aller weys gleich den vordampfen. als yn letzten ps. ernach steet. Wend dein antlitz nit vō myr auff das ich nit gleich wird. den die yn die hell faren. Aber der vndersheyd ist. das die heyligen behalten ein güst gegen got / vn das sie mehr sorgen. das gottis güst / lob vn ehr vō yhn falle. dan das sie vordānet werden. dan er spricht nit in der hell ist kein freud ader lust / sinder kein lob noch ere. darumb furt er hie eyn. das niemant yn der hell gotte güstig sey / vn solt er dareyn faren wurde auch den gleich yn gottis vngunst das wehr yhm vber alle peyn. wider vn weh. darüb steet i canticis. das die libe gottis starck ist wie der todt / vn feste wie die hell. darumb das sie bleybe auch yn todlicher vnd hellischer peyn. Also spricht auch

gott durch Isaiam. Ich will dich zeumen mit
meynez lob. auff das du nit vorderbest/das ist eyn hertz-
liche gunst zu myr/will ich dyr mitten yn deynem leyden
geben vñ dasselb wirt dich zeumen vñ behalten/ An wil-
ches die andern all vorterbey ym leyden. Also auch ps
xviij. Mit lob wil ich anruffen got/vñ so wird ich erlo-
set werden. Dan leyden/tod/auch die hell mus vberwun-
den werden von vns. Mit flucht aber vñ vngedult/wirt
sie nit vberwunden/sunder mit gunst/willen vñ lieb. dar-
ynnen gegen gott behalten. Dis seynn scharffe rede/dem
alten Adā sunderlich der noch grun vnd frisch ist/helffte
aber nit.

6 Ich byn geengstet yn meym suffzen/

das ist/ich habe vil vñ seer ersuffzet. dz auch suffzē mein
erbeyt gewesen. Es wirt myr saur vñ erbtam mein lebē/
dan es ist nit meer dan ein suffzen. Nach der weys redet
mā auch. Ich hab mich gemüet ad geerbeytet mit laufs-
fen/mit schlahē zc. also hie auch. ich hab mich geerbey-
tet mit suffzen/byn vnrüzig gewesen vor suffzen. Was
wil nu diser vers? Zu merckē das er nu beschreybt vñ vor-
setzet/was eyn rechtes leben sey. dan ynn diser probe ist er
gelernet. dass cyn rechts leben nit steet yn vilen wercken/
als die jüden meynten. widder die er nu hie anhebet zu res-
den bis an des psalmen ende. Sundern es steet nur yn ey-
nem creutzigen vnd toden des alten menschen/also das
des eusern menschen wandel. es sey nach der werlt ader
nach der scheynend heyligkeit soll zu nichte werden. vnd
alleyne das besten/das Christus sagt/ Selig seynn die do
weynend vñ hungern vñ dursten nach der gerechtigkeit/
dan ditz leben soll nit anders seyn / dan eyn has vber dem
alten menschen/vñ eyn süchen vñ vorlangen des lebens/
yn dem newen menschen. Ist nu der vorstand. Tu sehe
ich das die werlt vñ alles fleisch vnd bluet eyn schedlich
eytel dinc ist/yn yrem lachen/frolich/reych/mechtig sein
vnd eer haben vnd des gleichen/dan sie fület nit was ich

fület hab. darumb helt sie das leben vor gut. weyß aber
nit was ernach folget. darumb ist besser/ weynen/ clagen
suffzen/ dan lachen vnd frolich seyn. singen/ ruge/ frid/
vnd gemach haben.

Ich will alle nechte waschen meyn bette.

In hebreisch also. ich wil die ganze nacht schwoymend
machē mein bette/ das ist/ so seer wil ich weynen. das die
threne sollen schwoymen yn meynes bette als auch ernach
folget.

Mit meynen threnen wil ich begiffen mein lager

Das ist aber nit möglich vnd auch nie gehört adder ges
lesen von einem heyligen gescheen/ nach laut der wort.
darumb seyn die wort ym geyst geredt. auch ym geist zu
vorsteen. also das seym seel so hefftig widder den alten
menschen entzundet ist. das. wenn es dem leybe möglich
wehr. wolt er so vill weynen/ darumb als vil als an ym
ist. ym willē. ist gleich als gescheen. dan der wille ynnes
wendig der ist das gewichte. aller euser werck vnd leben.
vñ solte der leychnam folge thun. eyner seelen die grunds
lich rew hat vnd entzundet ist ym der warheyt. er müß
neher dan yn eyner stund zufließen wie der schnee. vñ vor
gehen. vnd dis ist alles nu widder die torichte werlt ges
sagt. als solt er sagen. O yr blinden elenden kinder. yr ligt
mit guter ruge vnd gemach auff weychem lager/ vnd
treibt ewer wollust darauff/ gantz ym sause lebet yhr.
wol gebettet vñ beleydet. vorwar wustet yrs anders. yhr
wurdet die bette vñ lustige lager/ mit augen threnen was
schen. da yr nu aufflützet vñ lust habt. ach gott. es seynd
nit lager der seligkeit/ die des fleyschs lusten dynen/ sie wes
ren wol (wer es thun kunde) so zu berweynen/ das sie yn
den threnen schwoymeten.

7 Meyn angesicht ist vor zorn vorwuffet.

B

Das ist/meyn gestalt vñ ganzer euser wādel des leybs/
ist vorandert vñd vngestalt worden vor der werlt/dan
ich pfleg vñ warte seyn nit. ja ich vorwolge yn. mit peyn-
lichen vñ clagenden leben/vñd das als vor zorn/den ich
empfangen hab widder das eytel fleysch/auff dem zorn
den ich vō got gefület habe. die werlt aber pflegt yrer ges-
talt yn seyden/golt/vñd scheynend essen wie d̄ reyche mā
im euangelio. Ich byn aber der arm vñd vngestalte Las-
zarus worden/durch meynē willigen zorn/auff das ich
gottis zorn entgehe/wilchē niemant entgehen mag/dan
wer seyn Adā creuziget/vorwuffet vñ zu nichte machet.

Ich byn voraltet/vñd denen/die alle mein feinde seynd

Das ist/ich byn vntuchtig vñd vnnutz vor der werlt/
gleich wie ein alter mensch. darumb vorachtet sie mich
ynn meynem leben/ja vorfolget mich. dann es ist yhr zu
widder/vñd wils nit leyden. also macht myr ditz leben
ym creuz nichts anders dā seynde/dan alle sein sie meine
seynde. Wer ditz nit weysf ader nit gleubt/der sahe nur an
eynm rechts leben nach dem creuz Christi/Balde wirt er
finden das die ganz werlt widder yhn ist vñ vorpottet
vñ vorfolget als ein touchten/yrenden/bofen mensche.
Da musf seyn gestalt vñ wandel/voralten vñd zunichte
werden/sunderlich vor den hochsinnigen vñ großgeyst-
lichen/die sich alzeit vndersteen die selben rechtfertigen zu
meystern / vñ nichts von yhn widder yre vornemen/vñd
dunckell zu horen ader leyden/das seyn die allerley weysf-
heyt vñd gerechticfeyt haben/an die yn dem creuze ligt/
vñd ist yn der ganzen werlt nit volck/das mehr widder
das creuz sichtet/dann sie. Niemant auch weniger seyn
eygen syn/eygenweysf/eygendüffel/todtet aber vorwirfft
dan die selben. ja den selben bofen gebrechen/schmuckent
vñd befestigen sie mit scheyne guter werck/meinung vñd
wort/auch auff der schrifft gezogen/vñd also ane forcht
sicher vñd kunlich vorfolgen ader meystern wollen/den
recht warhafftig gerichtten von denen spricht er nu.

8 Weychet von myr alle/die yr thut das nit recht ist.

Das in disem nit allerley vngerechten vorstanden seyen/
sundern die groß geystes vñ heyligkeit vñ weysheit seyn/
bewert sich auß Matt. 7. do der herr Christus eben disen
halben vers eynfurt widder die/die am iungsten tag wer-
den sagen. Eya herr. haben wyr nicht yn deinem namen
geprediget vñ vill wunderzeichen than zc. dissen clugen
vnd heylgen/wirt hie durch Christu gegeben/das sie heys-
sen oparij iniquitatis/Theter des vnrechten adder vbel-
theter/darumb das sie/das gute nit recht thun/das seym
nu die rechten seynd der christenheit. dan sie hat nach me-
ander seynd gehabt/nach hat/nach haben wirt/dan die
do recht haben wollen/vñ vmb vngerechtigeyt willen/
vo: meynen die gerechten zu vortilgen/so sie doch mit als
lez fleyse also leben/das sie nur yn ruge/frid/ehr/gemach
gnugde/vñ nit yn creutze ader vnruhe leben mügen/vnd
von den andern groben sundern kein ander vnderseyd
tragen/dā das ihene/in fleysslichen dingen lust suchen/
vnd dise yn yren geistlichen gutern weysheit vñnd vor-
nufft vñ frumickit. ja hoffertiger vñ tisser yn lust der sel-
ben stecken/dan die groben sunder ym fleyssch.

Dan gott hat erhört das geschreye meins weynen.

Die weyl sie oben ligen vnd meynen rechthaben/so glets-
ben sie nit/das die/die vnderligen vor got etwas seyn/sun-
dern sie meinen gott ein dinst daran zuthun/vñ der wars-
heyt beysteen. Vnd disse vnforcht vñ sicherheit vordams-
net vnd vorderbet alle yre thun. dan an forcht vñ demut
mag gott niemant behagen. darumb spricht er. Gott ist
so beraten. das er die schreyenden vñ clagende gerne hort
vñnd nit die sicheren vñnd freyen. darumb steet nit eynt-
gutis leben/ynn eusern wercken vnd scheyne/sundern yn
eynem seuffzenden vñnd betrubten geyste/als ernach ym
vierden psalmen.

Das opffer das gott behaget.

Bij

ist eyn betrubter geyst/ vñnd eynn demutiges gebrochens
hertz vor schmeßtu nit. vñnd im 33. ps. Nah ist gott. allen
den. die eins leydedes ader betrubtes hertzen seynd. darüb
weynen geet vor wircken/vñ leyden vbertrit alles thun.

9 Got hat erhört meyn abbitten. gott hat meyn gebet
auffgenommen.

Nit anders drucken auß. dise wort/dann eyn geystarme
seele die nichts mehr hat. dan das geschrey/flehen vñ bitz
ten yn festem glauben/ starcker hoffnung vñ steter lieb. vñ
also soll seyn geschaffen eyns iglichen christens leben/vñ
wehen/das er außer gott nichts wisse ad habe. Auch den
selben/nit anders/dan ym glauben. Darumb werden die
die anderst seyn/nit erhört vō got/dā sie auch nit ruffen/
mit dem hertzen/sie seyn nit arm noch zuruffen ader bittē
durfftig/sat vñ vol seyn sye. Vñ abbittē heyst das gebet
das widder das boße weg zulegen. Erbitten aber/das
zum guten zu erlangen geschicht.

10 Ach das sie schamrot wurden vñ seer erschrocken
alle meine feynde.

Das ist/sie steen so schedlich vñd ferlich/yn yrem wolge
fallen/vñ rümen sich bey yhn selv/als weren sie gar woll
daran. ach gott/ sie wissen aber nit wie vnseelig sie seynd/
darumb weer yhn gut/das sie yn sich selv kenen vñd seer
erkennetē wie seer sie schemlich vñ elend vor got geachtet
seyn/dā die groß geistlichen vñ weisen/kümen nit anders
dan yhn selv wolgefalle/sicher seyn/yn yhn selv glouern/
groß vō sich haltē. Eyn to:heit falen/als wol reden/recht
thū. heylig meinē/sunderlich seyn gegen anderen/ nit vill
gleichen wissen/das ist die großt blindheit aufferdē/dar
wie vill sie sich yn disen dücken vñ achten ad heben/also
vil sein sie vor got vorachtet vñ beschemet. vñ dz wolt er
dz sy es erkēnetē ab sie wol sein seind sei/dā sie würdē wol

frund. wan sie ynn sich selb kenen/vnnd vor yhn selb erschrecken. das erheben macht sie seynd vnnd vorfolger/ aber die demut/das ist die scheinbde vn̄ schrecken/macht sy frunde.

Das sie widderkeert wurden.

Dan sie seynd zu tieff vnnd zu ferr von got/ yn das yhre abkeert vnd gegangen.

Vnd seer schnell zu schanden wurden.

Inwendig für yren augen/da sie sich gantz yn eeren halten. Auch außwendig vor den leuten so es not ist. zu der inwendigen/anders ist die außwendig alleyne/vn̄ an die ynwendige. vnfruchtbar. auch schendlich.

¶ Der Ander Buspsalm̄.

- 1 Selig seyn die. den yre vngerechtikeit erlassen seyn/ den yre myffetadt bedeckt seyn.
- 2 Selig ist der mensch/dem got nit sünde zurechnet vnd yn seyn geyste nit triegnis ist.
- 3 Dan ich hab geschwigen/alle meyne gebeyn seyn voraldet do ich den ganzen tag schrey.
- 4 Dan tag vnd nacht drucket mich schwerlich deyne hand. Ich byn bekeret ynn meyn jamer/also der dornstachel eynegestochen ist.
- 5 Meyne sünd hab ich dir gebeichtet. vnd das ich nit gerecht byn. hab ich mich nit entschuldiget.
- 6 Ich hab gesagt/ ich will gott meym herren beichten das ich nit gerecht sey/vnd du hast myr erlassen den vngheorsam meynen sünd.
- 7 Vor die selben wirt auch eyn iglicher heylig bitten vor dyr yn der gelegen zeit
- 8 Aber yn der syndflut viler waser werden sie an yhn nit langen.

Bij

- 9 Du bist meyn zuflucht yn der voruolging die mich
vmb ringet hat/ Erlose mich o meyn freude. vō den
die mich vmb ringet haben.
- 10 Ich wyl dyr vorstand geben. vñ dich vnderweyßen
yn wilchem wege du wandern salt. ich will meyn
augen stete auff dich haben.
- 11 Werdet nit wie die pferd vñnd meüler
die do keynes vorstands begreyfflich seyn.
- 12 Mit zeumen vnd gebiß zwenge yre backen
die sich zu dir nit nahen wollen
- 13 Vll plage muß haben der gote vngheorsam ist/
wer aber yn got setz seyn hoffnung. den wirt barmh
herzickeyt vmbfahen
- 14 Frewet euch yn gott vnd tanzet yr gerechten
vñ seydt rumretig all die yhr eins richtigē hertzē seyt.
- 1 Selig seyn die/ den yre vntugent adder vngerech
tigkēyt erlassen seyn

Als er sprech/ Niemāt ist an vngerechtigkēyt/ sondern als
zumal vor gott vngerecht. auch die/ die sich ym wercken
der gerechtickēit vben. vnd also auß der vngerechtigkēit
zukumen vomeynen/ dan es kan ym selbs niemāt erauß
helffen. darüb selig seyn sie/ nit die keyn sund haben ader
sich selbs erauß erbeyten/ sondern alleyne die/ den sie gott
erleset auß gnaden. Wer seynd aber die? das wirt der 5 6
vnd 7 vers lernen.

Den yre missetadt bedeckt seyn.

Niemāt ist auch ane missetad die got an vns allen siche
gātz offenbar. Selig aber/ den er sie zudeckt/ nit sehen/ nit
gedencken/ nit wissen will/ sondern leuterlich vorgeben
will auß gnaden das seyn die sie nit selb zudecken/ nit selb
yhn erlassen/ vorgebē/ vorgeffen/ sundan ansehen. wisen
gedencken vñ straffen.

2 Selig ist der mensch dem gott nit sund zurechnet

Das ist/ Nit selig. sundern vn selig ist der/der ym selb nit sund zurechnet. ym selb wolgefellet. sich frum dunckt/nit gewissen tregt/vn schuldig sich weys/vnnd darauff sich trostet vn verleset. so doch d Apostel sagt. ich byn myr nichts bewust/aber darauff byn ich nit gerechtfertig. als sprech er/sündern selig ist d/dē got nit sund zurechnet. das gote nichts bewust sey vmb seyne sund. das seynn die/die yhn selb zurechnē steticklich sund vn gebrechē mägfeltig.

Vnd ist nit ym seym geist yrzen ein triegnis/

Das ist/das ym selbs seyn hertz nit betriege/ so er außen frum scheynet vn sich selber nit anders dan frum achtet/vn gottes liebhaber. so doch inwenig die meinüg falsch ist vnnd nit gott vmb gottis willen/sündern vmb seyns selbs willen dienet vnnd frum ist. Wilcher boßer falscher betrieglicher list allermeist vorturt/ die groffen scheynenden vnnd geistlich menschen. die vmb yres frums lebens willen/vn vill guter werck forchtlos steen/ vnd nit warnemen ernstlich yres geistes vnd ymmerlich meinüg. Auch nit wollen zu sinnen nhemē. das diser betrieglicher schedlicher list keynen menschen frey lest/sündern ganz geystgrundig ym allen ist. allein auß gnaden gottis auß getriben wirdt/ darüb heyst er es eyn list ym geyst/ Nit eyn list den der mensche thue vnd mit wissen erdencke. wider sich adder ein andern/sündern den er leydet vn ym angebom ist der sich mit gutz leben lest decken vn schmuckē/ das der mensch will wenen er sey reyn vn frey. so leyt erst der boße vnflat darüder/den nennen die doctores amore sui/amore dei concupiscentie so der mensch vmb forcht der hellen adder hoffnüg des hymels/ vnd nit vmb willen gottis frum ist. das ist aber schwer zerkennen/nach schwerlicher los zuwerden/vnnd als beyd nit dan durch gnade des heyligen geysts gescheen mag.

Nu ist hie zu mercken das der prophet vierley vntugent
nennet/als Vngerechtigeyt/Mysssetadt/sund/List. Vns
derscheydlich so ist vngerechtigeyt/ das der mensch nie
frum vor gott. beraubt des das er habē soll/ das ist frum-
keyt vñ gute werck. das ist der erste schaden. Der ander ist
Myssetad. das seyn die bösen werck/ die do folgen als
der ander schad auß dem ersten. Gleich wie auß armut
folgen mag stelen adder eebrechen/ vorraten vñ der gley-
chen. vnd diese vngerechtigeyt seyn auch die guten werck
die also gescheen yn beraubtir vñ abwesender warer frum-
keyt die auß gnaden geboren wirt. Der dritt.

Sund ist das böse der natur das do bleyben ist vnd als
geyt bleybt wā die mysssetad geschiet vñ vngerechtigeyt/
vnd ist die böse lust /lieb. socht yn der haud gewachsen
vñ angeboren wilch reizet zu den ersten zweyen. wilchs
ist eyn bleibende sünde yn dieser zeit/ vnd an yr selbs ist sie
totlich/ wan gott auß gnaden sie nit vberhube. den. den
sie leyd ist vnd begeren darvon gesund werden. darumb
spricht das gott die selb nit zurechnet. als sprech er/ sie ist.
da aber gott auß gnaden rechnet sie nit/ darüb ist sie teg-
lich/ vnd wirt also bald totlich/ wan der mensch hoffer-
tig wirt vnd nit daruber leyde tregt an vnderlas. Vnd
darumb ist sie eyn betreugnis vñ subtiler list/ allen den
die yn guten wercken sich vben vnd frum duncken/ meyn-
nen sie seyn nu reyn/ vñ nit glauben das gottis gute. yre
vñreynikeit durch gnaden nit rechne.

3 Dan ich byn still worden/

Das ist/ eer ich diese ding wusst. erhüb ich mich vñ rümet
mich bey myr selb. gefill mir selb wol. yn meym guten les-
ben. wußt nit anders dan ich weer nun reyn vñ frum.
Aber es hat sich geleet/ ich byn stil worden/ Rummen hat
sich yn eyn clagen vorwandelt. dan mein frumkeyt ist myr
erkent worden das sie ein böshheit sey.

Eraltet seyn meyn gebeyn

Das ist/ alle meyn crefft/ all mein vor:mügen/ auch trost
meiner frumkeit ist schwach vnd alt/vntuchtig worden
vor dir/das so frisch. starck vnd iunck war vor myr/ vñ
nemlich spricht er. Voraldet. das mag auch also vor:stā
den werdē nach dem 7. vers des ersten buch psalmen/das
ist/vor großem angst deynes gericht/s/byn ich alt vñnd
graw worden. dā wie eym lydenden menschen zeit lang
ist/vil mehr vbertrefflich/ist sie lāg/da die gebeyn leyden
das ist die crefft der selen vor dem anblick des gottlichen
gerichtes das der heylig geyst leuchtet schrecklich ym eyn
vornessene seelen das er sie demutige vñnd sich erkennen
lerne. darūb spricht sie. O wee got/wie lang soll das ans
blick leuchten/ meinn beyen werden darvor alt/schwach/
krāg/mich dūckt ich muß gründlich vorderbē ewicklich.

Do ich den ganzen tag schrey.

Das geschrey kumpt vō der groffen angst eygenes erken
tenise/ wilchs kūpt von ansehen empfindlich blicks des
gotlichen gerichtes wie gesagt ist/dis geschrey ist vnmes
lich/ vnd mit keiner zūgen aussprechlich alleyn den erfars
nendem bekant. Alle tag. das auch ym vorgangens psal.
spricht. Ich wil waschen alle nacht mein bette.

¶ Dan tag vnd nacht ist schwer dein hand vber mich

Das ist deyn erschrocklich gewalt ist myr zuschwer. dars
umb schrey ich auch vnd clag tage vñ nacht/ es ist weyt
vber mich dein hand/kann nit erleyden deyn straff die du
myr drawest mit sulchem blick.

Ich byn eyngekeret yn mein jamer

Das ist/ vorhyn war ich auß gekeret von meym jamer/
ich sahe nur meyn lust ym myr selbs/nu sihe ich anders/
ich meint ich weer selig. nu byn ich iamerig yn d warheit

Als der dornstachel eyngestochen ist
Das ist/die weil mich so grausam tiffsticht. das vrtel
deyns gerichtis / vñ myr eynen dornen yn das elend gewis
sen stecket/durch dringend alle crefft meiner seelen.

5 Mein sund hab dyr Bekennet. |

Das ist/so still bynn ich worden. so gar hatt sich rümen
gelegt/das ich bekene vorwar das ich nie gut gethā hab/
sundern vill sunde vñ bofes auch da/da ich woll thet.

Vnd das ich nit frum sey hab ich nit vorborgen.

Alls die thun den der list ym geyst betriglich zuvorsicht
macht das sie auch sich selbs an socht. durffen rechtfer/
tigen entschuldigen/vñnd daruber yn gezang sich gegen
ander leut legen. ynn hoffart/zorn hay/vngedult/vrtel
vñ nachreden fallen. vmb yrer vn schult willen erst recht
schuldig werden vnd yn dem allen dennocht recht vñnd
woll than/billich gehandelt wollen haben. Die vorbers
gen tieff yhr bofheit/dan sie sehen an yre frumkeit/vñ bes
kennen gott nit yre sund warhafftig vnd an argelist yres
geistes ynwendig. Aber die rechten menschen bergen nit
yre bofheit. zurnen nit/ werden nit vngedultig/ab man
yhn vnrecht thue/dan sie meinen nit das man yhn kund
vnrecht thun/so sie keyn rechtickit bey ynn finden. vñnd
das seyns die seligen/den gott yr vngerechtickit erlest vñ
vomeynt. darumb das sie die bekennen vñ voriaben/vnd
weil sie yre sunde nit decken ader bergen/so decket vñ birt
get sie gott.

6 Ich hab gesagt.

Das ist / ich war ym fursatz/ich beschloß bey myr / also
solt er sagen. so gnedig bistu/also gerne hōrestu war bes
kenntnis vnd demutig beichte. das du auch als balde tro
stest vñ erhebest. als bald der mensch vornympt sich zu
demutigen. Als balt er sich eyn sunder erkennet vñnd dirs
elaget/als balt ist er gerecht vñ angeneem vor dyr.

Ich wil bekennen gotte widder mich selber mein]

ungerechtigkeite.

Das ist/ich will mich selbs schelden/ so lobet mich gott/
wil mich schenden/so erret mich gott.ich wil mich vor
clagen/so entschuldiget mich got. ich will widder mich
reden/so wirt got fur mich reden.ich will mein schult sas
gen/so wirt er mei vordinst sage. als er teet Marie Mag
dalenen im hause Symonis leprosi.

Vnd du hast erlassen myr die vntugent meiner sunde

Du hast erlasen. darumb das ich sie hab gerechnet vnd
bekennet/ den vngchoram meiner sunde. dann impietas
heisset eygentlich das mā nit thut das man thun soll vñ
das ist zurweyln allein / aber in allen sunden leufft es mit.
auch yn allen guten wercken/die nit yn gnaden gescheen.

7 Vor die selben werden auch bitten vor dir alle deyn
heylgen.

Das ist. darumb werden sie heylig seyn. das sie yr bosheit
dir clagen vñ gnade bitten/ vñnd mercklich vor dir. dan
ab sie wol vor den leuten heylig scheynen das achten sie
nit. sundern forchten dein gericht vñ wissen das yhre hey
lickeite vor dyr nichts ist. sundern demutig deiner gnaden
warten.

In der gelegene tzeit

Weder yn der tzeit der gnaden. dan die selb ist die gelegne
zeit zu bitten als der prophet Isaias sagt. Ich hab dich
erhoret yn der angenehme tzeit. in wilcher seyn die heyligen
wan sie got rüret vñ heimsucht mit dem licht d gnaden.

8 Aber yn der sindflut der wasser

Das ist/der heylig der also steet nit auff seyner heilickeit/
sundern auff dem selb deiner gerechtikeit/die Christus ist
auff wilche gegruendet ist eynn iglicher der seyn selbs

vorleger streffer vñ richter ist/wen nu vile stoffe vñ gran
sam anfechtung her fallen gleich wie cynn syndflud mit
wasser. das ist/wen man yhn vmb des demutigen lebens
willen vorfolget als im vorgangem psalmen gesagt ist.

Werden sie ym nit nahen/

Das ist/sie werden ym nit schaden an der seel ab er auch
leib vnd leben lassen must.

9 Du bist mein zuflucht.

In allen disen zustrumenden wasser der anfechtung/du
bist meyn fels darauff ich stee. das sie mich nit erschuffen
vnd erschlinden.

In der vorfolgung die mich vmb ringet hat
das seyn die wessere/ anfechtüg allenthalben ringsrüb.

O meyn trost (freud/wonne) erlose mich von den
selben die mich vmb ringet haben.

Als oben berürt ist/dann ein frolich gewissen ym gottis
barmherzigkeit vberstret alle dise obgnäten widsturme
vnd anfechtung. Nun antwort gott.

10 Ich wil dyr vorstand geben vnd dich vnderwey sen
yn dem weg darynn du wandeln salt.

Darynne ich dich haben wil. du bittest ich fall. dich erlos
sen/ last dyr nit leyde seynn / lerne du mich nit. lere dich
auch nicht/ las myr dich ich wil dir meisters gnug seynn/
ich wil dich furen den weg darynne du myr gefellig wã
delst/ dich dunckt es sey vorterbet wann es nit geet wie du
denckest/das dencken ist dir schedlich vnd hindert mich.
Es musß geen nit nach deym vorstãd/sundern vber deym

vorstād. Seneck dich yn vnno:stād so gebe ich dyr meyn
vorstand. vnno:stand ist der rechte vorstand. mit wissen
wo hynn du geest/das ist recht wissen wo du hyn geest.
Meyn vorstand macht dich gar vnno:stendig. so ging
auf Abraam von seym vaterland vñ westet nit wo hyn
Er gab sich yn mein wissen vñd ließ faren seyn wissen/
vñd ist kōmen den rechten weg an das rechte ende. Sich
das ist der weg des creuzes den kāstu nit finden/ sondern
ich muß dich furen als eynn blinden. darumb nit du. nit
ein mēsch/nit ein creatur/sūdern ich/ich selv wil dich vñ
derweyßen / den weg da du ynne wandlen sollt. mit das
werck das du erwelest/ nit das leyden das du erdenckest/
sondern das dyr widder deynn erwelen dencken begirde
bekūmet. do folge/do ruffe ich/do sey schuler do ist es zeit
deyn meyster ist do kūmen/ do sey nit ein pfert adder vñ
uonūsttig thier/ solgestu myr vñd vorlesest dich. Sich
also dan.

Will ich mein augen stete auff dich haben .

Will dich nit lassen du salt nit vor:sinken/ will deyn nit
vorgessen/deyn augē soln zu sein vber dich die weil mein
augen offen seyn vber dich/ Hastu nit gelesen die augen
gottis seyn offen vber die frūmen vñ der berg moia hoist
dñs videbit/anzweissel das ich allein es sehen fall/ gleich
wie ich als da Abraham vor:sach darynne er sich gar
nichts vor:sach. das ist kurzlich nit anders/ dan ein rech:
ten eynfeltigen glauben vñd feste vor:trawen/zunno:sicht/
hoffnūge wil got von vns haben / darūb wirt yn disen
worten nit mit namen der glanbe/ hoffnung/demut/ges
dult/sondern was der selben tugent art vñ eygentlich nas
tur ist/ausgedenckt. Vill seyn die von den tugendē schri
ben/meer die namen preisen dan yr natura an weisen.

11 Seyt nit wie die pferde vñd meuler die nit begriffig
seyn des vor:stands.

C

Das seyn die/die mich nit lassen regiren/sundern gleych wie die synlichen tieren folgen. So ferr sie fülen/ wo sie nit fülen ader prüfen folgen sie nit. Dan pferd vñ meüler seyn nit geschaffen das sie soltenn begriffen die dinck die nit empfindlich seynd. darüb werde sie auch nit darvon bewegt zu lieb adder leyd. Also die menschen die nit weyter thun lassen ader leyden wollen. dan eben was sie ernes kunnē vnd begreifen/ fülen/prüfen. vñ die kunnē meins vorstands nit messig werden. Sie seynt gleich mit vorzunfft/das die pferd seyn mit den synnen/ Beyde nit weyter. dan empfindlich wandelen.

12 Mit gebissen vnd zeumen zwenge yre backen/die sich nit zu dyr nehen wollen.

Das ist. die nit wollē vorsteen die do seynd wie die pferde vñ wollens machen nach yrer guten meinüg vñ dücken. den selben sende so lange widerwirdigkeit bis das sie müssen erzu. das heist cōpelle intrare/wā not/willē macht. vñ das müssen yn das gerne vorwandelt wirt. als lang bis das er spricht. Sall ich so wil ich/Muß dan so seyn so sey es also. Szo zwenget got die widspenstigen pferde vnd meüler/ wen er nit zulest das sie erlangen was sie wollen/die selben zum ersten/ die queer geen yn dem wege gottis/gleich wie die mütigen pferde bis das sie ynn den gang künen vñ vorstād lernen das es muß geliden seyn vnd nit nach vnserm willen geen.

13 Vill plage muß haben der gott nit acht.

Das seynd die / die sich salb regiren/ gottis regiren nit leyden wollen/nit anders wandelen dan nach yrem dücken die gott nach mit susse nach sawr/nach mit locken nach mit drawen zwingen kan/die zaum vñ gebiß zu reysen/ vnd doch meynen sie achten vñnd eren gott auffß beste/ sie seynn die gehorsamsten. die frumsten. die richtigesten/ darumb das sie eyn gute meynunge haben/ vñ das recht

sey was yr gute meinung gibt. den widderstrebt gott als
zeit. dan sie seyn hoffertiges synnes/vñ gottis sinne/seind
sie nit vnderthenig. darumb müssen sie vill leyden/vñ
plage haben/vñ ist gar vmbsonst/an all vordinst vñ
trost.

Wer aber yn gott hoßset den wirt die barmhertzekeit
vmbfahen.

Gleich wie gene vmb ringet das gericht vñ gottis
darvon sie vill vnglucks vñ nichts glucks haben/darüb
das sie auff sich selb steen. yr hoffnungen auff yr eygene
gute meinung setzen. Also die richtigen menschen die nit
auff sich selb/nach auff yr gutduncken hoffen ader sich
erlich vorlassen die vmbseht die barmhertzekeit/da von
sie vill gutis vñ glucks haben. darüb beschleust er von
den selben.

14 Frewt euch yn got/vñ hoßset auß hertzen wonne
yr gerechten.

Das ist/die yr ynn gott trawet. mügt euch auch yn gott
frewen/die yr ynn euch nit trawet nach frewet/sundern an
euch selb vorzweyffelt/vñ betrübt/euch selb feynde seyt
vñ nichts yn ewer meynung gefellet.

Vñ vberhebt euch all die yr eins richtigen hertze seyt

Das ist/seyt trozig vñ vbermütig/erhebt euch/rümet
euch/habt eyn wolgefalle gleich wie eyn mensch der glo-
riert. dan das hertz das richtig ist zu got/vñ nit cynges-
krümet auff sich selb/ader etwas anders dā gott/ist auff
das ewige gut gegrundet vñ steet/darüb hat es vberflus-
sig.da von es glouen.prachten/prangen vñ trozen kan.
Als der Apostel sagt. Wer glouern wil der glorier yn got
Aber die krümen seelen yn sich selb gebeugt mit falschem
gutduncken vñ betriglicher guter meynung prachten
auff sich selb vñ nit yn gott.

Cij

¶ Der Dritt pufpsalm.

- 1 Ach gott. straff mich nit yn deinem zorne/
vnd castey mich nit yn deinem grym
- 2 Dan deyne pfeyle synt ynn mich gesteckt
vnd du hast vber mich befestiget deyne hand.
- 3 Es ist keyn gesundheit yn all meym fleysch
vor dem angesicht deines zornes
- 4 Es ist keine ruge alle meinem gebeyne
vor dem angesicht meiner sunde.
- 5 Da mein sunde seynd myr vber mein heubt gegägen
vnd als ein schwere last seyn sie vber mein crefft
schweer.
- 6 Es seyn stinckend vñ voreytert worden meine narbē
vor dem angesicht meiner to:heit.
- 7 Ich hab mich vbel gehabt vnd hab mich nyder ges
krümet/den ganzen tag byn ich betrubt gangen.
- 8 Dan meine lenden seynd voll aller schande/
vnd ist nichts gesunds yn all meym fleysch
- 9 Ich byn volle leydens vnd seer gedemütiget
ich hab geschreyet vor gro:ez seuffzen meins hertze.
- 10 Ach gott dyr ist offenbar all mein begirde
vnd mein seuffzen ist dir nit vorborgen
- 11 Mein hertz schluttert mir/vnd all mein crafft hat
mich vorlassen/vnd das liecht meiner augen ist
auch nit bey myr.
- 12 Min frund vñ mein nehsten haben widderstanden
difer meiner plage
- 13 Vnd mein zuhorende seyn ferne von myr gestanden
vnd haben gewalt getan die do suchten meine seel.
- 14 Vnd die myr vbel wolten haben geprediget vnnutze
leere/vnd truglich rede haben sie all tage gehandelt.
- 15 Ich aber gleich wie ein tauber mensch hab yhn nit
zu gehoret/vñ gleich wie ein stüme hab ich nit auff
than meynen mund.

- 16 Vnd byn worden als eyn mensch der nit hoeret
vnd der keyn widderede hatt yn seynem munde
- 17 Dan yn dich hab ich gehoffet meyn gott/
du wollest mich erhoeren/meyn gott vñ mein herr
- 18 Dan ich hab gesagt/dass nit mein seynd vber mich
sich freweten/vnd so mein fusse straucheln. das sie
sich vber mich nit rumeten.
- 19 Dan ich byn zum leyden gemacht/vñnd mein
schmerzen ist myr alzeyt vor mein augen/
- 20 Dan das ich nit gerechtfertig byn wil ich vorkündigē
vnd an meyn sunde will ich fleysfig gedencfen.
- 21 Aber meyne seynde die leben/vñ haben sich gestercket
vnd die mich vnbillich hassen haben sich gemeeret.
- 22 Vnd die bos vor gut widder geben haben mich
vo:prochen/darumb das ich dem guten folgte.
- 23 Vorlas mich nit/gott meyn herr/
vnd weyche nit von myr.
- 24 Hyle myr zu helffen
O gott meiner selicfeyt.

Disen psalmen betet Christus yn seynem leyden vñ puf/
die er vor vnser sund than hat. ja das ist die rechte regel.
wer all psalmen hoeret/ gleich als auß Christus müd ges
redet/vnd also yhm nach redet wie ein kynd seyn vatter
nach betet. kan ym aber nit nach beten/er sey ym dā gley
chformig yn der puf vñnd leyden. darumb malet disser
psalm auffß aller klereft. die weys/wort/werck/gedanckē
vñ berden. eyns waren rewigen hertzen.

1 Ach gott straff mich nit yn deinem zorn

Die straffe wirt vorstanden mit worten/ als man eynn
vbelteker schilt.

Vnd rastey mich nit yn deym gryme

Das geschicht mit wercken als im. 2. psalm. dan wirt er
reden zu yhn yn seynem zorn (das ist straffen ym zorn)

Cij

vnd yn seynem gryn wirt er sie erschrecken/ das ist mit
der tadt vnd wercken straffen.

2 Dan̄ deyne pfeile synd yn mich gesteckt.

Die wort gottis. ym wilchen erschilt vñ darwet ym der
schiff: das seyn die pfeyle. wer die fület. der schreyt/ Ach
gott straff mich mit ym deynes zorn. es fület sie aber nie-
mant. dann wem sie ynß hertz gesteckt werden. das seynd
die weyherzigen mēschen den sie got ynß hertz scheuset.
denn vnvorsichtigen aber/ die vorhartet seynd/ fallen sie
ab/ gleich wie von eym harten fels/ vnd das geschichte
als lange. als durch menschen predigen/ die wort gesagt
werden. an mitwircken vñ ymmerlich eynschiffen gottis.

Vnd du hast ober mich befestiget deine hand.

Das ist/ nit alleyn deyn zornige wort geen myr tieff zu
hertzen/ sondern auch dein zornige werck seyn stetig ober
myr/ vnd drucken mich. das seyn die zweyerley leyden.
Auszwendig die werck/ das ist vnmolzung des leybs/ vñ
yinnerwendig erschreckend der seel von den Worten gottis/
dann ein izlich auswendig leyden bringt mit sich ein
innerwendigs darumb das/ wenn gott auswendig an-
greiff. so furchtet das hertz den zorn gottis/ mit sünden
vordienet haben. vnd also fallen dan die schwere spruch
vñ draw wort her zu. wan das eufferlich anfallet. darüb
bitt er/ eer vor das innerwendige leyden.

3 Es ist kein gesundheyt yn meinem fleysch

das ist als im ersten psalm. Erbarm dich mein/ dan ich
byn schwach/ dann das fleysch ist zum leyden schwach
vnd krank vñ kan die hand vnd werck der straff gottis
nit tragen.

Vor dem angesicht deins zorns

Das ist/ vor den kegwertickeyt deiner straff/ dann durch

Das angesicht wirt die gegenwertigkeit ym der geschrifft
bedeutet. adder die empfindlicheyt eins dinges.

4 Es ist keyn ruge all meinem gebeyne

Das ist/den ynwendigen crefften der seelen/ als auch ym
ersten ps. Mach mich gesund dann erschrocken seyn all
meyne gebeyne.

Vor dem angesicht meiner sünde/

Vor der empfindlichen gegenwertigkeit/vñ erkenntnis meyn
er sünd. dan die pfeyle gottis/vñnd zornige spruch ma
chen gegenwertig die sünd ym hertzen. vñnd da von wirt
ynwendig vnruhe vñnd erschrecken des gewissen vñnd
aller crefft der seelen vñnd die hand gottis. das werck der
straff auswendig/macht ganz krank vñnd leydende den
leychnam/vñnd wo es also steet/ da steet es recht mit dem
menschen. dan so hatt es Christo gangen.

5 Dan meyne sünd seynd myr vber mein heubt gägen

Das ist/sie haben mich ganz vnderdruckt vñ seynd meer
vñnd stercker dan ich byn. das küm et als von den pfeylem
die machen die sünd so vill/ so groß/ so starck das der
mensch ym selb dar von nach helffen nach raten kann/
sundern ligt vñden daryder.

Vñnd als eyn schwere last/seynd sie vber meyne crafft
schwere.

Das ist schwerer. dan ich erleyden kan/ als auch psal. 6 4
herr got/die tad vnser sünde. hat vñs vbermechtiget. du
wollest gnedig seyn vnser vngerechtigkeit. also tritt vñs
die sünde mit füßen/bis das die gnade kümme vñnd trete die
sünde mit füßen vñnd erheb vnser heubt vber sie. das woyr
yr/vñnd nit sie vnser mechtig sey vñnd regire. Die aber ym
sünden ligen tod. ader alzu heylig seyn. fülen diser ding

Keyns. Darumb ist es ein wunder dinc. wer do keyn sunde hat. der f.let vñ hat sie vnd wer do sünd hat. der f.let sie nit vñ hat keyne. dan es were nit möglich das er vber vñ widder die sünd clagete. wan er nit ynn der gerechticheyt vñ gnaden lebte. dan ein teuffel iagt den andern nit auß/ sünd vorclagt auch yre gleichen nit. vñnd ein wolff beschreyt den andern nit/ vñnd ist doch vnmöglich das er solt an sünde seynd. der widder sie schreyd. dann er muß yhe nit mit ertichten Worten vor gotte reden / Mus war seyn das er sünd hatt. als er sagt. vñnd doch auch war/ das er an sünde sey/ vñ also gleich wie Christus zu gleich lebedig vnd todt warhafftig was. also zu gleich müssen sie vol sünde vñ an sünde seynd die recht christe seyn.

6 Es seyn stinckend vñ voreytert wurde meyne narben

Gleich wie wunden vñ schwolste. faulen/ eytern vñ stincken am leybe. also auch die bösen gebrechen der natur/ vortoben vñnd stinckend werden. so man nit teglich ywartet vnd heylet mit der salbe der gnade/ vñ mit wasser des wort gottis. gebeetes vñ der puf sie weschet. Tu geen sie hyn. sicher. vñ nemen der selben bruch nit acht/ gerade als weren sie gesund. Darumb folget

Vor dem angesicht meynere tozheit/

Vor der kegwerticheyt dan die weysheit ist das salz vñ wasser das die wunden reyniget/ welche weysheit ist nit anders dan grütlich seyn selbs erkennen. als puer. xj. wo demut/ do weysheit. dan die erkenntnis lests nit zu das der mensch sich so vortoben las. Die tozheit aber ist. wann der mensch nit siht sich selb/ sondern meynt er sey gatz gesund/ die pfeile aber offenbaren disse tozheit. das der mensche erkennet wie blind er gewesen sey. yn sein selbs erkenntnis. darumb ist der sinne/ do ich mein tozheit. vnd mein selbs vnweisen erkennet. do hab ich auch erkēnet wie cleglich mein wunden vortoben vñnd stinckend seind. das

ich vorhyn yn meiner torheyte nit sahe. darumb

7 Hab ich mich vbelgehabt vnd hab mich seer nyder
gekrumet

Gleich wie ein mensch dem leyde vnd vbel zu müte ist/
der hatt außwendig elend gebirde/schlecht das heubt ny-
der/vnd lustet yhn das heubt nit auffheben/sehen/horen
ader reden/sundern seyn augen auff die erden beuget.

Den ganzen tag byn ich betrubt gangen.

Das seyn rechte zeichen grundlicher reue vor die sünde/
als der publican im euang. nit seyn augen torst auffhe-
ben/der hatte sich vbel vnd nyder boget sich zur erden/
meer mit dem hertzen dan mit dem leybe.

8 Dan mein lenden seyn voll aller schande.

Solt ich nit mich vbel haben/so ich sehe das ich ynnere/
wenig yn myr nit dan sünde vñ böse neygung finde das
von ich vor gott nur schande vnd spot habe/dan durch
die leyden drückt er auß der hertzen vñ böse gründlich vn-
reynikeit/vnd gleich wie reynikeit eyn eere ist/also vn-
reynikeit ein schande. diese aber ynnere schande sehen
die nit groß an die von der euserlichen reynikeit yhn selb
wol gefallen/so es doch vor gott sol vñ muß gantz reyne
seyn.

Vnd ist nichts gesunds yn all meym fleysch.

Das sagt auch Apos. Paul⁹ Ro. 7. Ich find yn mir das
ist yn meinē fleysch nichts guts / sundern nur schand vñ
sünd. darumb auff das die selben wunden/eyter/stand/
sünd ze. von vns genomen wurden hatt auch Christus
seyn fleysch lachen gleich machen yn der peyne wie vnser
yn der schult vñ sünd. vnd also vor beyderley diese verß
gesprochen. dan Apostolus sagt das seyn fleysch gleych

sey vnserm sundlichen fleysch seyns ynn leyplicher peyn/
vnser vn geystlichem schaden.

9 Ich byn voll leydens vnd seer gedemutiget

Als ein betrubtes hertz/das beweget sich hyn vnd her vnd
nicht dan jamer vnd elend bey ym findet vnd ganz zurs
schlagen vn genydert wirt yn seinen augen.

Ich hab geschreyet vor seuffzen meyns hertzen/

Gleich wie eyn lawe schreyet vnd ruyget/das ist, wā das
hertz so voll leydens ist/vnd seuffzens. das sichs nit ent-
halten kann. es bricht er auß durch eynn cleglichs heulen/
das ist gar ein volckömenderew.

10 Ach gott dyr ist offenbar all mein begirde/

vnd mein seuffzen ist dyr nit vorborgen.

Das ist/ mein begird ist so groß das ichs mit Worten nit
sagē kan. Ich weys nit zu bitten. meyn hertz das sehestu/
was fall ich meer sagen? grosser ist mein leyd. dan mein
clagen seynn kann/das hat auch der erst psalm. Ich hab
geerbeytet ynn meym seuffzen. als sprech er. voll leydens
vn jamer gewest mit seuffzen.

11 Meyn hertz bebet myr.

Ein fest steendes hertz ist/das ym guten müt ist/vn sicher
aber das do matt ist vnd jamerig/ das beweist sich. vnd
vnstete ringet es hyr vn dar/vn ist gleich als ein vaf/das
man hynn vn her rottelt vnd keret/ vn ganz ynn vnruhe
schwebt/darumb das vill des leydens vsach vnd groß
seynd/die es bewegen von eym zum andern.

Vnd meyn crafft hatt mich lassen/

Das kann meyn hertz auß meyn crafft nit widder zur
stille vnd ruge bringen. Also auch Christus spricht ym
21. ps. Meyn hertz ist gleich wie eyn fließendes wachs/
vnd mein crafft vordoret/ das machen als die pfeyl/die
wircken disen ynnwendigen jamer.

Vnd das liecht meynen augen ist auch nit bey myr

Das ist/ich kann myr auch nit raten. vor hynn do meyn
hertz fest stund. kund ich myr helffen mit meyn crafft/
vnd myr raten mit meyn vurnunft/ vnd mich trosten
mit meynem hertzen. das ist nu gar do hyn/an trost/an
hulff/an rad ich nu byn/ dan deyn zorn. deyn hand vnd
pfeyll seynd vber mich. Tu dise zwey leyden seynd nie
gnug. das dritt vn̄ das beste muß auch erzu/das der leys-
dende ym leyden. leyden muß.

12 Meyn frund vnd mein nechsten haben widder
gewesen meynen plagen.

Dem leydenden menschen geburt billich/ mit leyden.
barmhertzigkeit vn̄ beystand/ sunderlich v̄ seynen besten
frunden. Tu werden nit erger seynd/ dan die frund seynd/
dann wer ist der gerechticheyt/ warheyt/ weysheit/ neher
frund vn̄ yhr billicher beysteet/ dan die gerechten/ weysen
warhafftigen? Tu aber sichtet niemant stercker widder
die ware gerechticheyt/ dann die gerechten (als sie heißen
vn̄ meynen) Niemand so seynd der waren weysheit. als
die weysen die können ganz nit leyden. die wort. werck/ vn̄
leben des grund gerechten menschen. dann sie wollen nit
sunder nach narren seynn. das meynt er nu das sie seynd
widder gewesen seynen plagen / das ist seynem leydenden
leben seynd sie seynd vnd v̄folger gewest. habens vor
eyn torheit gehalten vnd v̄tilgen wollen.

13 Und meyn anhorende seyn ferne vō myr gestanden

Das seyn die selben fründ/die solten nah seyn. so weychen sie ferne von yhm dan sie seyn dem creutz seynd/vnd vorfolgen das yn allen die es tragen yn der meinüg/ sie thun wol daran/das ist bedentet in dem leben Christi. den seyn natürlich fründ vorfolget haben die juden. darüb spricht von yhn der. c. viij. ps. Er hat mit barmhertzeckeyt than/vnd hatt vorfolget den armen vnd durfftigen/vnnd der eins betrubten hertzen ist hat er gesucht zu toden. vñ psal. 68. Sie haben vber den schmerzen meiner wunden meer leyden zuthan. dan es kan nit anders seyn. die reichgeystigen musen vorvolgen die armgeystigē wie Esau Jacob

14 Und sie haben gewalt gethan.

Das ist/sie haben alle yre macht vnd kunst vorsucht/nichts gespart/nach wort nach werck.

Die meyn seel gesucht haben.

Die das vorteben meiner seel gesucht haben/mit werckē mich hindern/vñ mit Worten mich vorsuren/ als volgt.

Und die myr vbel gewolt haben.

Das ist/die meyn seel schadē begereten so sie doch dars yn meyn selickeyt furdern meynnten/ dann darumb disputirten die juden mit sanct Stephano/vñ alzeit die eygens weisen/eynreden vnd widdersprechen den warhafftigen gerechten. auff das sie yhre reden zu nichte machen. vnd yre eygen wort bestetigen / das doch vbel vñ schaden der seelen ist.

Haben geprediget eytelckeyt.

Sie wollen nit reden ader leeren den weg des creutzes vnd der vngetichten demut/sundern die werck vnnd gerechtikeyt yrheselber/ das doch eytel vñ vnnutz leere seynd/ dan

sie machen. mit weyße nach gerechte leute/sonderum mer
hindern vnnnd vo:folgen die weisheit vnnnd gerechtikeit
gottis.

Vnd triegerey/haben sie all tag' gehandelt/

Sie leeren nymmer anders dann widder die gnaden/ doch
vnder dem scheyn. der warheit vnd gerechtikeit. darüb
ists eynn triegerey der seelen/vnnnd eytel. an frucht des/ des
scheyn es furtregt/vnd das heist den seelen strick legen vñ
yre vnglück vñ vbel suchen/auf aller macht. dan fleissig
ger sein sie. yre triegerey zu predigen/ dan andere die rechte
warheit/vñ das heist/das sie gewalt thun vñ alle macht
drann wenden. Triegerey heist das/ do gut scheint/
vnd ist nit gut. als seyend alle leere der guten werck. an der
gnaden vnd barmhertzikeit gottis predigung.

15 Ich aber gleich wie ein tauber mensch. hab sie nit
gehoret/

Das ist/ich hab yre falsche gutescheynende wort nit auff
genommen/ bynn bey deiner warheit bliben. alls Christus
Joh. x. sagt. das seine schefflein horen nit die stimme der
frömbden leerer/sondern seyne stimme.

Vnd gleich wie ein stüme. hab ich nit auffthan mey
nen mund.

Ich hab geschwigen vnnnd yhn nit eynrede than. darüb
das sie mit gewalt/vnnnd ganzer vorhartung yhre ding
getriben haben/dann den hunden soll man nit das heylz
thum furwerffen vnd die edlen steyn nit den serwen. Auch
wo niemand zuhored. do gib nit auf das wort / sprach
Salomon.

19 Vnd byn gewesen wie ein mensch der nit horen kan
vnd als eyner der nit widder rede haben kan yn sey
nem mund.

D

Dise zween vers clagen das/das die wider die gründliche
leere der rechten warheyt/leeren. alzeit vberdingen vnd
meer geachtet seyn vnd zuhorer haben. dan die rechte frū-
men/dan das weniger teyll/folget der warheyt/vnd das
merer teyl dem scheyn der warheit. darumb ist der synne/
ist das nit ein elend ding das die warheit mus schweyge
die allein solt reden/vñ die triegererey wil mit eynrede/straff
nach widerspuch leyden. Sie will gehört seyn/vñ allein
reden/mit gewalt. darüb byn ich worden als ein stüme/
vñ tauber. dan ich thar nit reden vñ mag nach wil auch
yhr ding nit horen. Das aber dise zween vers nit von
Christo am creutz hangend geredet seyn nach des schrifft-
lichen synne/ist darauf clar. dann er hoert zu dem mall
nit triegererey vñ eytelkeit/die alzeit eyn schein haben/sun-
dern offenbar lesterüg vñ bosewort an allē guten schein
dan horen vñ reden/an dissem ort/heyst/schuler vñ meys-
ter sein. Nit horen/ist nit wollen schuler sein. Nit reden
ist nit meyster seyn.

17 Dan yn dich hab ich gehoffnet meyn gott.

Darumb hore ich sie nit/vñ schweige. dā ich nit wil auff
meyn weysheit/frumkeyt/warheyt/als sie leeren vñ thun
Südem lauter auff dich vñ dem gnade/mein trost setzen

Du wollest mich erhorn/meyn gott vñ mein herr.
Meyne hoffnüg wirstu nit lassen/du wirst meinē begeer
wol antworten vñ gnug thun. Myr geburt zu bitten vñ
warten deyn vnd deiner gnaden. deyn ist aber/das du
mich erhorest. mein bitten antwo:st vñ meiner hoffnüg
gnug thnest. die aber saat seyn/vñ nit begeren/die warten
auch auff nichts/sie hoffen auch auff nichts/darüb er-
horet sie niemant/niemand antwo:tet yhn/niemāt darff
yhn auch gnug thun/sie haben schon gnug.

18 Dan ich hab gesagt.

Meyn sorgē ist geweest/vnd habe bey myr gedacht. O
wolt gott das sie nit an myr eyn freud erlebeten.

Dass nit meyn feynd sich vber mir freweten

Das sie nit endlich recht behalden/sundern als ym ersten ps. dass sie zuschanden wurden vñ schemen sich müssen Wen sie erkennen die rechte warheit/die sie yn myr vorfolgen/vnd yre trigerey die sie crefflich erheben.

Vnd so meyn fuße strauchelen wurden sich vber mich rümeten.

Das ist/ich hab gesagt vñnd geforcht/das mein fuß vil leicht nit strauchelten das ich nit bestunde mit der warheit/dan so das geschee/wurdē sie sich vber mich groß rümen vñ prachten vnd glouern. die weil nu mein hoffnung yn dir ist. Erhore mich mein gott/vnd las nit dar zukömen/das sie an mir freud vñ rum erleben. las gnug seyn das sie mich hassen vñ vorfolgen vñ der warheit willen/das sie nit auch recht darzu behalten/die doch nit haben dan sie yn sich vñ mit yn dich hoffen

19 Dan ich byn zum leyden bereyt

vñ mein schmerzen ist mir alzeit vor meinen augen Ich wegere das leyden vñ straffe nit. ich byn willig vnd bereit darzu. ja es ist billich vñ recht/das ich nur leyde/vñ gleich zum leyde bereyt/gebörn vñ geordnet/dā ich volker sind byn. Eym sunder gebürt seyn straff vñ peyne vñ gotte. Ich bitt nur/das sie nit recht behalten. die dem leyden/demütigem vñ des gecreuzigten leben seynd seyn gerad/als weren sie recht vñ nit leyde/sundern frid vñ eer vordienet. Wie ist aber der schmerz vor seinen augen alzeit? das ist. ich hab das vor meym augen dauon ich schmerzen trage vñ leyde. das seynd die sünde.

20 Dan das ich ein sunder byn/wil ich vorkunden

Ich wil bekennē vñ nit leugken das ich ein sunder sey/vñ mir nit gerechtickit zuschreyben. vñnd das ist die vrsach

D ij

Darumb ich leyde trage altzeit/das ich voll funde bym.

Vnd an mein funde will ich fleysfig gedencen/

Das ist als ym. 4. nechst volgend ps. Mein fund ist mir altzeit vor meinen augen vnd mein fund will ich bekennen. das ist gleich eyn syn/ mit dissem vers. Tu gleich wie die weysen/gerechte/heyliche hoffertigen/ bereyt seyn/ frid vñ ruge/gemach vñ eer auffzunemen/ vñ haben vor yren augen nichts. das sie betrubt ader schmerzgend/ sundern yhnselfs lustig vnd wolgefellig ist / dan sie vorbergen vñ mit vorkunden yre funde/dencken auch nit daran/ sondern allein an yre frumikeit/vnd anderer leut funde/ als der nach folgend vers sagt. Szo ist ein recht grundlicher mensch gleich ander weyt. als disse zween vers sagen. dann also spricht auch der heylig Apostell Paulus Ro. 7. das fund yn yhm wonet vnd yn funden er gefangen lige/ so er doch nit vbels/sonder vill guts außerbalt. Auch Christ⁹ gebent allen den seynen/ sie sollen hassen yhre seelen/ Tu ist doch nichts zu hassen dan alleynn die funde/wo kömē dā die funde yn die frümē/ das sie die hassen sollen. dā er spricht nit das sie allein die vorgāgen fund hassen sollen die ni vorgeben vnd gepüffet seyn sondern die seel vñ das leben das anzweiffel nach an yhn ist. disse funde achten die hoffertigen heiligen gātz nichts vñ geen sicher daher/ vnd sagen es seynd teglich fund vñ nit widder das geboot gottis. Szo das war ist. warüb heisset er dan sie hassen vnd der Apostell clagt. er sey gefangen darinne? dan widder die teglich fund ist kein geboot/vñ sie fangen auch niemant als sie sagenn.

21 Meyn seynd aber die leben vnd sein starck

vñ sie haben sich gemeret die mich vnbillich hassen
Das ist/ich leyde vil vñ geet mir vbel. aber meinē feynden geet es woll/wie dan hiere. xij. vñ Abatuck. i. beschreibet.
Sie leben. ich ste. be an vnderlaß. Sie seyn mechtig vnd

starek. ich werde an vnderlas nyder gedruckt. sie seyn yn
eeren/ ich ynn schmachheit/sie yn fride/ ich ynn vnfride/sie
meeren sich vnd haben yr vill die yhn gunstig seyn/die sie
loben/die mit yhn halten/ich byn allein vorlasen vn̄ nie
mand mit myr helt/ ader gunstig ist/also gar vngleich
vnd anderweyt. steet eynn recht warer heylig gegen den
scheynenden vn̄ falschen betrogenen heylgen.

22 Vnd die bos wider geben vor gut/haben mich vor

prochen darub das ich dem guten nachfolgete.
Die selbweyßen vnd eygen rechtfertigen/kunnen nit an
ders dan bos vor gut widder geben. dan die rechte leere/
die man yhn gibt vnd yhn das beste saget vn̄ wol dien et
das doch gut ding ist. vorfolgen sie/ vnd geben haf/ vn̄
marter darfur. dartzu vorsprechen sie vn̄ nachreden. aln
die das selb gut suchen vnd ym folgen/das macht/das
dasselb gut/nit offenbar ist/sundern vnder dez creutz vnd
zu nicht werden. vorborgen ist yn gott. Sie aber wollen
nit zu nicht werden/ yn yrem leben/vnd guten scheyne.
Sie wollen auch etwas seyn ader wollen zornen/vn̄ vn
gluck anrichten. Vnd doch ynn dem selben dem guten
zufolgen vormeynen. Es ist aber warhafftig das bose
vn̄ vorterbē yhrselbs v̄ dem do weichet der frume vnd
wirt darumb vorprochen von yhn.

23 Vorlas mich nit gott meyn herr/

weyche nit von myr.

Ich byn eyn eynsamer von allen vorlasen vn̄ vorachs
tet. darumb nym du mich auff vnd vorlas mich nit.
Gottis natur ist/ das er auff nicht/etwas macht. darub
werd noch nit. nichts ist/auff dem kan gott auch nichts
machen. die menschen aber machen auff etwas eynn an
ders. das ist aber eytell vnnutz werck. darub nympt gott
nit auff/dan die vorlasenen/macht nit gesund/dann die
francken. Macht nit sehend. dan die blinden. Macht nit

Dij

lebend dan die todten. Macht nit frum/dan die sunder.
Macht nit weyßen. dan die vnweyßen. Kurtz. Erbarmet
sich nit/dan der elenden. vnd gibt nit gnad. dan den yn
vngnaden seynd. derhalb kann keyn hoffertiger heylig.
weyße/ader gerecht/gottis marterien werden/vnd gottis
werck yn yhm erlangen/sundern bleibt ym seynem eygen
werck vnd macht ein ertichten/scheynenden falschen ges
ferbeten heyligen auß yhm selber. das ist ein heuchler.

24 *Eyle myr zu helffen!*

Ach gott meines heyls.

*Eyle du mir zu helffen/dan all andern eylem mich zu vor
terben dann gottis hulff ist nit wo menschen hulff ist. ja
wo nit menschen vorfolgen ist. ad von yhm selbs wider
sich selbs. dan got ist nit eyn vater der reychen/sunder der
armen witwē vñ weyßen/die reychē hat er ledig gelasen.
O gott meyns heyls/das ist/das ich keyn heyl nach sel
lickeyt wider yn myr selbs/nach yn yemād anders suche.
dan bey dyr allein. Also auch im iij. ps. Got meynere ge
rechtikeit hat mich erhoret/das ist/der sie gibt. die hoffer
tigen aber haben heyl selickeyt vnd gnug von yhm selbs.
Ihr selickeit/ist nit gottis selickeit/Sie habē sie yhm selbs
Bereyt. darumb das sie nit vordāpt seyn/nach seyn wolt
Gott aber seliget nur die vordampften/nicht als ettlich
sagen. das sie sich achten als vordampften/vnd doch sel
lig seyn/sundern sie seyn vordampft/vnd ist nit da eyn ers
tichtet achten/dann mit gott kann man nit spigelen. Es
muß so seyn/wie sichs achtet/vnd nit anders seyn/vnd
anders achten/das heyst geheuchelt vnd gelogem vor
gottis augen.*

¶ Der Vierde pufpsalm.

1 *Ach gott erbarme dich meyn
nach deiner großen barmhertzigkeyt.*

- 2 Vnd nach der mennige deyner erbarmung
Tilge ab meyne vngerechtikeit
- 3 Wasche mich yhe meer vñ meer von meiner vngere-
chtikeit vnd mach mich reyn von meynen sünde
- 4 Dan ich erkenne das ich vngerecht byn
vnd mein sünde ist myr alzeit vor meynen augen
- 5 Dyr alleyn byn ich ein sunder/vñ eyn vbel theter vor
deynen augen Auff das du allein rechtfertig seyst yn
deynen worten/vñ vberwindest (ader besteest) wan
du wirst gerichtet.
- 6 Sihe/yn vngerechtigeyt byn ich empfangen/
vnd yn sünden hatt mich mein mutter empfangen.
- 7 Sihe/die warheit hastu lieb/ Das ynwendige vñnd
vorborgene deiner weyßheit hastu myr offenbart.
- 8 Besprenge du mich mit hyssopen/so werd ich reyn
wasche du mich /vñnd also werde ich weysser dan
der schnee.
- 9 Gib meynem gehorde freud vnd trost/vñnd so
werden sich erfrewen die gebeyne die zur schlagen
seynd.
- 10 Wende ab deyn angesicht von meynen sünden
vnd tilge ab all meyne vngerechtigeyt
- 11 Ach gott schaff yn myr eyn reynes hertz/vnd erneue
yn meym ynwendigsten ein richtigen geist.
- 12 Vorwirff mich nit von deinem angesicht
vnd nym nit von myr deinen heiligen geist.
- 13 Gib mir widder den trost deines heyles
vnd befestige mich mit eym freywilligem geist
- 14 Ich wil deine wege leren die vbeltheter
vnd die sunder sollen zu dir bekert werden
- 15 Ach gott. got meins heyls. erlose mich von den ges-
bluten/vnd las mit freuden auspredigen mein züge
deyn gerechtikeit.
- 16 Ach gott thu auff meine lippen/
vnd las meynen mund verkunden deyn lob.

- 17 Dan so dyrs wolgefallen were. hett ich wol kund
ein opffer geben / aber yn den opffern ist nit deyn
wolgefallen.
- 18 Das opffer das dir/mein got gefelt/ist ein zurbrochs
ner geist / Eyn rewiges vnd gedemutiget hertz. ach
got/das wirstu nit vorachten
- 19 Thu guttlich yn deinem guten willen mit Zion
auff dass erbarwet werden die mauren Jerusalem
- 20 Als danne wirstu angenehm haben das opffer der
gerechtigkeit / die ganz gebranten vnd andere opffer
danne werden sie selber opffern auff deinen altar.

1 Erbarme dich meiner. ach got/ nach deiner grossen
barmhertzigkeit/

Eynem warhafftigen rewigen hertzen / ligt nichts vor
augen. das seyne sund vnd elend ym gewissen. darumb
mag der auß grundlichem ernst. dise wort nit sprechen/
der noch etwas radts adder tads yn sich findet/darumb
er noch nit ganz elend ist/sundern eyn trostlein fület ym
yhm selber auß gottis barmhertzigkeit. ist nu der sinne.
Ach gott. keynn mensch noch creatur myr helffen mag
noch trosten. also gross ist mein elend/dann nit leiplich
noch zeitlich ist mein schade. darumb du der-do got bist
vñ ewig. allein myr helffen kanst. erbarme du dich mein/
dan an deyn erbarmē/ alle ding mir schrecklich vñ bitter
sein. Nit bitt ich aber dein erbarmen. das cleine. also du
dich zeitlich vber die leiplichen not erbarmst/sundern
noch deiner grossen barmhertzigkeit / also du dich vber
der seelen not erbarmst.

2 Vnd nach der menge deiner erbarmugen tilge ab
meyne sunde.

Vorhyn nennet her die grosse/ Tu die menge. das seyn
als wort einer gruntliche rewe. die do gross macht vnd

vill. die gnade gottis yn dem das sie groß vñ vill mache
yre sunde. dan als der Apostel sagt. Wo die sunden groß
seynn/do ist die gnade auch groß. da umb schmeckt die
gnade mit wol den hoffertigen/dā yhn schmeckent nach
mit vbell yre sund.

3 Wasche mich mehr vñ mehr von meiner vngerech
tikeit/vnd von meiner sund mach mich reyne.

Vorhyn hat er yn anhebendes menschen weysß gebeeten/
gnad vñ ablasß vor die gethane sund vñ anzuheben ein
anders leben. Tu bittet er fast byß ann des psalmen ende
yn zunehmender weise. das ym ymmer mehr vnd mehr
abgewaschen werde vñ gereiniget. dan die ersten gnade
ist ein ansahē zu waschen vñ reinigen/yn wilcher besteen
ja widder zu ruck gehenn. die allein wirklich euserlich
sund ansehen vnd daruber mit vorlust der gnaden vor
harten vñ erger werden dan vorhyn wie wol sie das nit
sehen noch meinen. Tu istts mit vns also das Adā auß
musß/vnd Christus eyn geen. Adā zu nichte werden vñ
Christus allein regiren vñ seynn/derhalben ist waschens
vñ reygniens kein ende yn differ zeit. dann Adā der vns
angeborn ist/macht auch vnser guten werck die wir thū
yn dem anhebende vñ zunehmen zu sunden vñ zu nicht/
wen got nit an sehe die angefangen gnade/vñ waschen.

4 Dan meine vngerechtheit erkenne ich/vnd mein
sund ist mir alzeit vor mein augen/

Das ist der vnderseyd der waren heyligen vñ der schey
nenden heiligen. das die sehen yhre gebrechen dass sie nit
seyn was sie seyn sollen vnd wollen/vnd darüb vireylen
sie sich selb/vnd nit sich mit den andern bekümmern. die
andern aber erkennen yhre gebrechen nit/vnd meinen sie
seyen nu das sie seyn sollen/alzeit yhr selb vorgeffen/der
ander leut freuel richter seyn/die verkeren disen ps. also.

Jch erken die gebrechen der ander vnnnd die sunde der andern seyn vor mein augen alweg. darüb das sie yre sünd auff dem rücken haben/vnd den balcken ynn yren augen Item das wortley/vnd meyn sünd ist widder mich als geyt/das widder mich/sall heysen wie dan vortentscht vor meyn augen/ader mir entgegen. als ein gegen wurff den man an sihet.

s Dir allein byn ich ein sunder/vnd ein vbeltheter vor :
deinen augen/

Diz ist der vers. der do lernet grüthlich vnser euserlich gute werck mit achten/der leut lob vnnnd eer von den selben nit gleuben. dan sie geschien yn vnreynickheit vnd gebrechlickeit/vñ werden auch mit vor gut gehalten vor gott/es sey dan/das wyr sie also bekennen/darumb ist die glos/die dissen vers. von den euserlichen sünden auflegt ferr vor rechtem grund. dan der euserlich sünd halben/anzweifel sündigen vnnnd thun wir auch vbel/nit allein vor gott/sundern auch vor den leuten.

Auff das du gerechtfertig seyst yn deinen worten/vñ
vber wundest wan du gerichtet wirst

Was ist das? kan gott nit rechtfertig seyn/wir seyen dan sunder? adder wer richtet gott? das got yn sich selb vnd yn seiner natur von niemant werd gerichtet adder gerechtfertiget. ist offenbar. dan er die ewige bestendige/wesende vnd nymer wandelbare gerechtikeit selb ist/vnnnd aller ding der vberste richter Aber yn seynen worten vñ wercken geschicht ym von den eigen rechtfertigen vnd eigen duncenden menschen. stetiges widder sprechen/widderstreben. richten/vordammen/vnd ist zwischen ym vnnnd den selben ann vnderlas ein kriegischer gerichtshandell/vber seinen worten vnd wercken/darumb ist gleich so

vill gesagt. das du yn deinen worten werdest gerechtfer-
tigt. also das deyn wort gerechtfertiget vnd vrhafft
erfunden vnd erkant werden. In alle die wort die der
hoffertigen widerspruch leyden/ist vns izt nit m̄glich
zuertzelen. wollen sie alle auff eym hauffen nennen/also.
Alle schrifft vnd wort gottis weyßen auff Chrust̄ leyden
als er selb bezeugt Luce vltimo. das die geschrifft nit an-
ders ynnehelt. dann vorheysene gnade vnd ablaß der
sunde/durch das leyden Chrusti. das wer ym yhn gleubt
vñ niemant anders. selig werde. disser warheit vñ Chrusti
leyden vnd gleuben. widderstreben all die/ die nit sunder
seyen wollen/ vnd sunderlich/ die eyns angefangen lebens
seyen. die wollen nu nit halten das sie sunder seyen vnd
seuffzen nit fast nach Chrusto. so doch got Chrustū ym
allen seynen worten vorheysen hat. vmb sund willen zu
sterben. darumb wer do nyme will ein sunder sich halten
vnd gehalten werden. der wil got zu eym lugener mache
vnd sich zur warheit. das die schwerst sund ist/ vnd ab-
gotterey/ ob allen abgottereyn/ darumb spricht Ioānes
der apostell. i. Io/i. Szo wir sagen das wir nit unde ha-
ben. so vorfuren wir vns selb/ vnd die warheit ist nit yn
vns. Itē. Szo wyr sagen. das wir nit sundigen. so ma-
chen wir gott zu einem lugener/ vnd seyn wort ist nit yn
vns. Darūb spricht nu der propheet. das mir dise gravo-
sam sunde der hoffart nit kome/ so beken ich/ das ich ein
sunder vor dyr sey/ vnd nichts gutes thue auff das du
besteeft mit warheit/ vnd recht behaltist/ vnd auch vber-
windest alle die mit dir zucken vnd sich rechtfertigen/
dich richtende ym deynen worten. dan got wirt doch zu
letzt recht behalten/ vnd vber wynden entwer/ hic mit gu-
ten/ adder dort mit ernst. vnd wirt nichts helffen. ab mā
vor den menschen adder vor vns selb/ rechtfertig seyn/
dan dauon mus man die augen abkeren/ vnd furchtlich
warten/ was gott darvon helt.

6 Sihe. yn vngerechtigeyt byn ich empfangen. vnnnd
yn der sunde hat mich mein mütter empfangen.

Sihe so war ist's das ich vor dir ein sunder byn/dz auch
sunde/mein natur/mein anhebendes wesen/mein empfangnis
ist/schweyg dan die wort werck vnd gedanken vnd nachfolgend
leben. Lynboffer Baum byn ich/vnd von natur ein kind des
horns/vnd der sunde. vnd darüb also lange als die selb natur
vnd wesen yn vnd an was bleybt. also lang seynn wyr
sunder vnnnd müssen sagen/vorlas vns vnser schuld zc.
byß das der leichnam sterbe vnd vndergehe. dan Adā
der muß sterben/vnd vorwese ce dan Christus ganz
erstee/vnd das hebet an/das busfertige leben/vñ
volbrenget wirt durch das sterben. darumb ist der
todt ein heylsams ding allen den/die yn Christum
glauben. dan er thut nit anders/dan vorwese vnd
zupuluert. als was auß Adam geboren ist/auff das
Christus allein yn vns sey.

7 Sihe/dan du hast lieb die warheit

Das ist die euserlich gerechticheit/vnd scheynende
frumlicheit. ist lauter triegererey an grund vnnnd
warheit. darüb das sie die ynnnerlich sunde
decket/vñ nur ein figur ist der grundlichen
waren gerechticheit. der selben bistu feynd/
aber die menschen lieben/sie/darumb so liebstu
die ynnnerliche warheit. Sie aber die euserliche
falscheit/du den grund. sie den schein.
darumb so sprechen sie nit/dyr byn ich ein
sunder zc.

Die ynnern vnd vorborgene deynes weysheit hastu

myr offenbart

Die weysheit gottis wirt den hoffertigen nur ym
euserlichen offenbart. aber denn demutigen wirt sie
yn ynnnerlicher warheit vnd vorborgenen grund
erzeigt. vñ spricht. dainer weysheit/dā sie ist nit
vnser/sündern gottis

der sie vns gibt. Das euser nu differ weysheit steet da
ynde. das der mēsch meynet mit vill wortē/ tichten/ wer-
cken gote zu dienen vnd nach zukōmen/ alles ynn euser-
lichem scheyne/ das eym iglichen menschen offenbar ist
vnd mublich zu thun/ also dan der geberden vñ weysen
vill seynd. In dissem suchet mann alles gott/ aber gantz
mit dem rucken/ vnd euserlichen/ jnnewendig kennen sie
seyen weniger. dan all ander. darumb das sie sich selb sus-
chen/ auch an got. mit den selben weysen studiren vnd
gottis erkennen zc. Das ymmerlich aber vnd vorborgen
differ weysheit/ ist nit anders/ dan grūtlich erkennen sich
selb/ vñ also sich selb hassen/ vñ alle gerechtikeit nit bey
sich/ sondern bey got suchen/ alzeit seyn vordriesen/ vnd
nach gote senen. das ist demutig got lieben vñ sich lassen
disse ynnere unbekante gerechtikeit. wirt bedeut yn allen
eusern zierden/ weysen/ Worten/ wercken. yn wilchen die
hoffertigen vorbleyben vñ vorharten/ darub got der den
grund vnd warheit liebhat. hasset sie. das sie liebhaben
den scheyn vnd heuchel.

8 Besprenge du mich mit byssoppen / vnd so werde
ich gereiniget.

Zie bewert er gleich mit eym exēpel/ das er vorgeredt hat
Als solt her sagen. das Moses vñ die puester des gesezes
sich vnd das volg besprengeten mit byssoppen yn bocks
blut getuncket/ vnd darvon sie sich reyn scherzten. ist nur
eyn euserlicher scheyn vnd figur/ aber nicht die warheit
die dar durch bedeut ist/ die du meinst vnd liebhaft. auch
nit das ynnerde deiner weysheit das du myr offenbart
hast. darumb besprenge du mich mit dem waren bocks
blut Ihesu Christi/ vnd danon werde ich yn warheit vñ
grundlich ymmerlich reyn am alle meyn wercken adder
mügen.

Wasche du mich/ vñ also werde ich vber den schnee
weys.

℞

Das ist/das euserlich waschen hend vñ fuße nach dem
gesetze macht mich nit weyß/sundern vorfirt mit seyn
scheyne. die nit wyssen das ymerlich das darinne bedent
ist. wilch die rechte ware weyßheit ist. Also nu dz sprögen
mit byssopen vñ mit wasser waschen. Euserlich nichts
nutz ist. zu der ymern waschung vnd besprengung. Dan
allein ein figur vñ lediges zeychen. also auch alle an
dere euserlich weyßen vnd berden/die nit andere wollen.
Dan das der gleich ymerlich got spreng/wasche/wircke
rede/pflege zc. mit gnaden des heylgen geists. vnd so ha
ben die alten liben veter die figur angesehen ym alten tes
tamente. vñ darunder vorstanden das ymerde vñ vor
borgene des waren vorstandts vñ der weyßheit gottis.

9 Gib meinem gehorde freude vnd trost/

Das ist/aller euserlicher gerechtikeit wädel vñ handel/
vornag nit mein gewissen zu trosten vnd sund wegnez
hmen. Bleybt yber all wircken vñ gute wercke das blode
vñ derschickne forchtsam gewissen. Bis lange. du mit
gnaden mich sprengest vnd weschest. vnd also mir ein
gut gewissen machst das ich hoer. deyn heimlich eynru
nen/dir seynd vorgeben dein sund das wirt niemant ge
war/dan der es hoeret/Niemant sibet es/niemant begreiffet
es. Es lest sich horen/vnd das horen macht ein trostlich
jrolich gewissen vnd zuvorsicht gegen gott.

vñ so werdē sich erfrewen die beyne die zurturrsibet

waren

Das ist alle trefft der selen / die des sundlichen gewissen
halben/gleich müde vñ zurturrsert werdē. die erfrewen
sich vnd werden erquicket. wan das gewissen die freude
des ablas hoeret. dan die sünde ist eyn schwere/betrubte/
engestliche burden allen crefften der seelen. vnd doch mit
den eusern wercken des menschen nit mag abgenomen
werdē/Sündern allein durch das ymerliche werck gottis

10 Wende ab deyn angesicht von meynen sunden/

Das ist/hab nit gestrenge acht auff meine wercke. dan sie seien alle sinde/so du sie yn deyn angesicht vnd gericht setzest. darumb spricht er nit. Wende ab mein sinde von deym angesicht/gerad also weren etlich werck die gottis angesicht leyden mochten. das er allein die sinde abwendte/vnd die guten ließe bleyben. Sünder her muß seyn angesicht abkeren/das die wercke vnd wyr besteen vnd bleyben mügen/das ist das er nit zurechnet auß gnaden das von natur wol sinde were. als am 31. psa. Selig ist der mensch dem gott nit sund ader schult zurechnet.

Vnd tilge ab alle meyne vngerechtigkeit

Das ist/was nach nit da ist vñ gerechtigkeit. vngib mir/also von dem bösen das nach da ist. abkeren deyn angesicht gebeten habe/dan vor gott/alle vnser werck/als gesagt ist. haben das sie nit haben sollen/das ist yn sunden gescheen sie darynne wir geborn seyn/vñ haben nit was sie habenn sollen/das ist gantz lautrickeit/der wir durch Adams sund beraubt seyn.

11 Eyn reynes hertz schaff/ach got yn myr/

Reyne hand vnd schone wort. ym eußern scheyne ist leichtlich zuthun vnd menschen crafft/ aber ein reynes hertz von aller ding libe gesündert. das ist des schepfers vnd gotlicher gewalt werck. Nach dem die schrifft spricht. das niemāt ein reynes hertz hab. derhalben auch all vor gott sunder seien. dem das hertz offen ist. also dem menschen die hand aber das werck offenbar ist keynes hertz. ist die warheit die got lieb hat. die ymmerlich gerechtigkeit aber yn diesem leben nymer voll erlangt/ vnd doch stete zuseuchen.

Eij

Vnd ein richtigen geyst ernew yn meym ynnereu-
digesten.

Yn trüner geyst ist des fleysches vnd Adams geyst. der yn allen dingen sich ym sich selb boget. das seyne suchet/ der ist vns angeboren. der richtige geyst/ ist der gute wille/ strack zu gote gerichtet/ allein got suchend der mus von new gemacht werden vnd eyngegossen von got. yn das ynnerste vnser hertzen/ das mit ein trignis sey yn vnserm geiste/ sundern auß gantzen grund gottis willen libhas bet werde.

12 Vorwirff mich nit von deym angesicht/

Wilchs geschicht allen den/ die sich nit vorwerffen vor yrem angesicht/ vnd gleich nit sorgen das sie von gottis angesicht vorworfen werden. ja sie setzen sich vor gottis angesicht vnd sich selb erheben. darumb werden sie ernydert vnd vorworffen/ dan sie meinen sie seyn reyn vnd frum vnd erleuchtet vñ also vnvorwerflich. Dise aber solen vñ wissen das sie billich seyn vorwerflich yrer sund halben. darumb kōmen sie zuvorn mit forcht vnd bitten das abe mit demut/ das die andern mit heylickeit erwunnen zu haben meinen.

Vnde deynen heiligen geist nym nit von mir.

Dann auß mir byn ich vordorben/ deyn geist mus mich lebendigē vñ erhalten. Auch an den heiligen geist selbs ist keyne gabe ader gnade gnugsam vor gott.

13 Gib mir widder die freud deines heyls.

Dan durch Adam sie vns allen verloren ist/ vnd mus an vordinst/ auß gnaden widder geben werden/ das heyl gottis/ wirt genent Christus in der schrifft der ist vns ein heyl vnd selickeit von got geben/ ym wilchem aller trost vnd freud ist der seelen/ die yre sunde fület.

Vnd mit dem freywilligem geist. mach mich feste

Das ist mit dem heiligen geiste der do macht frywilligen menschen/die nit auß peynlicher forcht/ ader vno:denlicher liebe gott dienen. dan alle die auß forcht dienen/seyn nit bestendig vn̄ fest/denn also lange die forcht weret. ja sie seyn gezwungen v̄nd mit widder willen ym dienen. also/wan keyn helle ader straff were. nichts dienen. Also die auch auß libe des lones ader gutes. got dienē seyn auch nit bestendig. dan wan sie westen/ keyn lon/ adder wan das gute abgeet. horen sie auch auff. disse alle habē nit freude ym heyle gottis/auch nit ein reyn hertz/ nicht/ ein richtigen geist/sunder seynd yr eigene liebhaber vber gott. die aber auß gutem richtigem willen gott dienen/seynd feste yn gottis dienste. es gee hir ader dar/ süß ader sår. dann sie seynd mit einem adelichem/ frywilligem/ furstlichem/ vngewungen willen fest vnd bestendig gemacht von got. Dan das wortley/furstlichen geiste/das hie steet/heyst yn hebreischer sprach auch ein freywilligen adder gunstwilligen/ vngewungen v̄nd vngereyztten geist. Was mit gewalt gehalten wirt/hat der were nit/ Was aber mit willen gehalten wirt/bleybt bestendig.

14 Ich will leren die vbertreter/deyne wege/v̄nd die
sunder sollen zu dir bekert werden

Das ist/ich will nu nymmer meer der mēschen gerechtikeit v̄nd wege leeren/ als die hoffertigen thun/ sundern den weg der gnaden vnd deiner gerechtikeit. dan so kōmen sunder zu dyr vnd werden warhafftig bekert. dann auß menschen gerechtikeit/ wirt man yhe meer von gott gekert/der hoffart halbē/die da seyn muß wo nit gnade ist

15 Erlöse mich von den geblütern o got. Got meines
heyls.

Die geblüte seynd die hoffertigen/die auß Adam geboren

Lij

nach dem blute alzeit widder diese leere vnd rechte weysheit streben/vñ wer sie leeret/der muß eynrede vñ vorfolgunge von yhn leyden. dan sie zu mal mit leyden wollen/das yhr ding nichts sey. die seyn nach mit yn gnaden/sunder ym fleisch vnd geblute nach menschlichem gutdüncken vnd scheyne frum seyn vnd darvon vill halten vnd gehalten seyn wollen. darumb spricht er/ O gott der du bist ein got meus heyls/das ist. Bey dem alleyn meyn heyl ist vnd mit yn mir nach yn meiner gerechtikeit/ader yrgen einer creaturen. Erlöse mich von den kindern des blutes/die yre selickeit yn yre fromickeit setzen. vnd darüb disser leer. widder streben/die alleyn die sunder bekert. als dan die juden den Aposteln/die heyden den mertern/die ketzer den doctorn/die hoffertigē noch thū den einfeltigen

Vnd also wirt mit freuden ausspredigen mein zūge
deyne gerechtikeit.

Das ist/ich wil nymer mehr predigen der menschen gerechtikeit/nachpreysen yre werck/sūdern allein deyn werck vñ das nit mehr sey dan deyne gerechtikeit/durch wilch alle gerechten gerecht sein. außer wilche. alle ander sunder seyn. dann wen du nit rechtfertigest/wirt mit seynen wercken nymer gerecht/darumb heysset es deyn gerechtikeit/das sie vns gibest auß gnaden vñ wir sie nit erlangen mit wercken. Vnd darumb

16 O herre thu vff meynen lippen

Das ist/gib mir stercke vnd mut das ich dasselb frey vnd kunlich predige widder die gebluten.

Vnd mein mund wirt verkunden deyn lobe

Das ist durch deyne stercke werde ich kune seyn/ alle menschen zu straffen vñ zu bertzegen das sie sunder seyn/vnd das nichts yn yhn sey lobes adder eren werd/ alleyn schand vnd straff vordienet haben Auff das sie erkennen

Das lob vmb eer allein deyn sey. darumb das die gerecht-
tikeit alleyn deyn ist/ vnd die weysheit ze. dan niemant
kan dich eeren vnd loben/ er scheld vnd schend sich selb/
Niemant kan dir zu schreiben weysheit vnd gerechtikeit/
er nehme sie dan von yhm vñ schreyb yhm zu eytel sünde
vnd torheit. disses lob vnd eer/ soll aussprengen dyr mein-
zungen. wan du sie offnest. dan wehn got mit sendet/ vñ
yn yhm redet kan disse leere nit aussprengen vñ gottis lob
eynbriengen. Vnd das ist das groste das wir gote thun
kunnen/ das er auch am hochsten begeret/ das man das
lob vnd eere ym gebe vnd als gute das yrgend ist. dar-
umb spricht er.

17 Dā so dirß wolgefällē were/hett ich wol vor mochte
zu geben ein opffer/ yn dem opffer aber ist nit deyn

wol gefallen/

Das ist/ du wilt das niemant yhm/ sondern dyr allein
lasse lob/ eere/ von der gerechtikeit vnd weysheit. darüb
fragestu nichts nach dem opffer/ vill weniger nach den
andern geringeren guten wercken. so das opffer doch dz
groste ist. du wilt. erbarmen vnd nit richter seynd. du
wilt nit ansehen wie frum wir seyn wollen. Sündern wie
frum wir auß dir werden wollen. das also du vñ nicht
wir gelobet vñ geceret werden/ das wir dir nichts geben/
sondern allein von dir nehmen gerechtikeit/ weysheit/
warheit/ vordienest/ gute werck ze. Vnd darumb

18 Das opffer/ das got gefellet/ ist ein gebrochener geist/

Eyn rewiges hertz vnd gedemutiget/ das wirstu o

got nit vorachten

Als sprach her/ als ander vorachtet er. an eyem hertz das
gedemutiget vnd zur brochen ist. dan das selb gibt yhm
die eer vnd sich selb die sünd. das hertz gibt got nichts/
sondern nimpt nur von yhm. das wil auch gott haben/
auff das er got sey warhafftig. den gote geburt zu/ geben
vnd mitnehmen.

19 Thu gutiglich yn deynem gutem willen/ Zion/ auff
das erbarwet werden die mauren Hierusalem

So die hoffertigen heiligen nit wollen dise leer auff nehmen/vñ darzu die andern yhre gerechticheit leeren so thu du doch den andern außeroleten deyn gnade/ nit nach yrem vordienest/ sondern ynn deinem guten willen/ Auff das erbarwet werden die mauren/ das ist. das erleuchte menschen werden yn der christenheit. die do bewaren vñ leeren die andern das sie nit von den falschen eigengerichtfertigen leren vnd leeren vorturt werde/ dan die mauren seyn die prelaten der kirchen die do sollen vornemlich yn dieser leer/ erbarwet seyn.

20 Als denne wirstu angenehme haben das opffer der gerechticheit.

Als sprech er. Nit werden sie dir opffern. bock vñ schaff vñnd kelber/ sondern opffer der gerechticheit. das ist. sich selbs. dann der opfert eynn opfer der gerechticheit. der do got gibt. was er schuldig ist. Tu sei wir got mehr schuldig dann wir haben. Darumb bezalen wyr yhn mit anders. dan geben vber als was wyr haben vnd was wyr selbs seyn/ vnd das mit demutiger erkentnis vnser sund/ vnd bekenntnis seyner gerechticheit/ das er gerecht seyn/ wie seyn gotlicher will mit vns handell. Dise weyße vñ gelassenheit ist die hochst gerechticheit die wir haben müssen vnd das rechte opfer das do heyst holocaustū. also hernach volget.

Vnde die holocausten vnd ander opffer den werden sie auff deynen alter kelber opfern.

In deutscher zungen kan man die hebreischen wörter nit ausdrucken wan wir nur das wortleyn (opfer) haben. das bey vns allerley opfer heyst gemeynlich. In dem

- 4 Dan meyne tage seynd vorgegangen wie ein rauch
vnd mein gebeyn seynde doregebraten wie ein gribel.
- 5 Ich byn geschlagē wie ein gras/vñ ist dor mei hertz
darumb das ich vorgeessen habe zu essen mein broet.
- 6 Mein gebeyne ist becliben an meym fleisch
vor dem geschrey meyns seuffzen
- 7 Ich byn gleich wie ein pelican yn der wusten
Ich byn gleich wie ein nacht eule yn den verwusten
heusern
- 8 Ich hab gewachet vnd byn gewesen
wie cyn eynsamer vogel auff dem dach
- 9 Den ganzen tage habē mich vrsprochē mein seynd
vñ die mich lobeten haben vber mich geschworen
- 10 darüb dz ich hab die aschē gleich wie dz broet geesse
vnd meynen tranck mit weynen gemischet
- 11 Vor der tegenwertikeit deyns zorns vñ vngnaden
darumb das du mich hast zurturset da du mich
erhaben hast
- 12 Meyne tag seynd gewichen wie ein schadwe
vnd ich bin vordort wie das gras
- 13 Du aber/o gott bleybest in ewicheit vnd
deines gedechtnis von eyner zeit yn die andern weret
- 14 Ach das du auffstundest. vñ dich erbarmest vber
Zion/ dan die zeit ist komen/ das du dich yhr erbar-
mest/ vnd die gelegenheit ist hie.
- 15 Dan deine knechte haben behegliche gemacht die
steyne derselben/ vñ haben erbarmlich gemacht die
erden derselben
- 16 Vnd die heydeschafft wirt erwidigen deinē name
vñ alle kunige d erden werden erwidigē dein glorie
- 17 Dan got hat erbarwet Zion
vnd ist gesehen worden yn seiner glory
- 18 Er hatt angesehen das gebeet der ledigen
vnd hatt nit vorschmehet yhr bitten
- 19 Diffe ding sollen geschriben werdē yn die zukünftige

- zeit/vnd das volck wirt gott loben / das von new
geschaffen fall werden.
- 20 Dan got hat herab gesehen vō seinem hohen tēpel
Got hat angeschawet von dem hymel die erden
- 21 Auff das er erhoret das seuffzen der gefangenen
auff das er erloset/die kinder der todtung
- 22 Auff das vorkundet werde seyn name in Zion
vnd seyn lob yn Jerusalem
- 23 Wan zusammen kumen die volcker ynn eynß
vnd die kunige/ dass sie gote dienen
- 24 Er hat vnderdrückt yn der wegsart mein crafft
Er hatt vorkurzet meine tage.
- 25 Ich will sagen. Ach mein got/nym mich mit hyn in
dem mittel meiner tage. Deyne jare seynd von einer
brit yn die andern
- 26 In dem anfang hastu o got die erden gegruendet
vnd die hymel seyn ein werck deiner hende
- 27 Sie werden vorwandlet/du wirst aber bleiben
vnd wie ein cleyd werden sie alle vorschlifen
- 28 Vnd wie ein decke wirstu sie wandlen vñ sie werden
vorwandlet werden
du aber bist derselb. vnd deine jare werde nit vorgehen
- 29 Die kinder deyner knechte werden wōhafftig bleyben
vnd yhrer samen wirt ewiglich vor dyr bleyben.

1 Ach got erhoer meyn geheet/vnd lasß mein geschrey
zu dyr kōmen.
das geheet ist/das er Christū begeert/das geschrey ist/das
er seyn elend vorcleret/wie dan folget.

2 Wende nit von mir deyn angesicht.

Seynit zōnig vber mich nach dem ich vordienet habe.
Dan antlitz abwendē ist ein zeichen des zorns / zukerent
aber ein zeichen der gnade.

In allen tagen meines leydens. Neyge zu mir deyn
oren.

Erhor mich/yn wileher zeit ich betrubt vñ leydend byn/
dan die oren zu neygen/ist nit anders/dan acht nehmen
auff des betrubten hertzen geschrey. Wierwol die selb neyg
ung auch das ausdruct/ab er nit so starck kund ruffen
ader begeren dass. hyn auff zu gottis oren drunge. Bitt
er. dass got sich neyge zu yhm herab/dass er yhm hore.

3 In allen tagē/wan ich dich anruffe. wollestu mich
schnell erhoeren.

Mit alleyn. Wan ich vorfolget werde vnd leyde von den
andern als der vorgeend vers. bittet. Sundern auch ym
aller notdurfft. dan diser psalm gleich wie die andern/
auch beschreybt. zum ersten das ynnwendige leyden das
die heiligen von yrhr sünde wegen tragen yn eyn rewigē
geist. darnach das vorfolgen der andern/vmb desselben
gecreuzeten lebens willen.

4 Dan meine tage seynd vorgangen/wie ein rauch

Das ist/meyn tag seynd zu nichte worden/vnd vnnoze
vorbracht/gleich wie der rauch yn der lufft vorschwin
det vnd zu nichte wirt Seelig seyn die/die erkennen das/
das zeitliche leben von Adams sünd wegen. nichts dan
ein eytel ist. als ps. 77. Vnd yhre tage seynd vorgāgen yn
eytelkeyt. das ist wie ein rauch dan es bleybt nichts dar
von. das yn ihenem leben nutz sey. ja es ist auch hie ym
diser zeit meer ein scheyn adder zeichen dann eyn leben/
als der rauch/mur ein scheyn vnd zeichen des feners hat
vnd nit das wesen.

Vnd meyn gebeyne seynd durgebrattē wie eyne griebe

Gleich wie das feror außzeugt/als feyst/vnd macht eyn
durre griben. also auch die libe der zeitlichen dingen/ein

boshes sewr nicht alle crefft der seel durr. crafftloß/ vnd
vberdrüssig zu den ewigen guttern/ Das finden alle mens-
schen yn sich von der erbsünd. die vns hat abwendet vñ
dem ewigen gute. darynne wyr solten feyste vnd crefftige
libe haben. yn aller lust vñnd freud. Szo seyn wir leyder
geneyget zu dem vorgecklichen vnd auff vns selb/ vnd
darynne lust/ freud vnd lib/ das ist fett vñd safft haben.
Woll den die die selb lust vñnd freud hie kennen. clagen/
vnd hassen.

Ich byn geschlagen wie das gras/ vnd ist dorr mein
hertz.

Das gras abgeschlagen/ adder gebrochen vorlust seyn
nen vrsprung das der eynflissende safft vnd feuchtikeit/
vnd wirt durr vnd wirt gut sewrwerck. also sein wir all
yn Adā durch den teuffel geschlagen vñ beraubt vñsers
vrsprunges. das ist gottis von wilchs eynflyßen wir sol-
ten grunen vñ wachsen/ darüb seyn wir gnadlos. dorr/
vñ des ewigen sewrs materien worden. Aber widerumb
am. 71. psal. von denn lebendigen spricht er. Sie werden
grunen wie das gras auff der erden. Nu das dorr hertz
ist/ das nit lust hatt zu dē ewigen gut. die weil das fleisch
grunet zu dem zeitlichen.

Darumb das ich vorgeffen hab zu essen mein broet.

Solt ich nit dorr werden/ wan meyne narung myr ynt
ein vorgeffen komē ist/ des dorren hertzen broet ist nimāt
dan gott selber/ der allein mag die hertzen speysen/ dan dz
hertz muß ein ewige speys haben. fall es satt werden. dis
vorgeffen meinet er. die selb obengesagte plage. das wyr
vor lust der creaturen/ leben vnd seyn yn einem vorgeffen
vnd vnachten. des ewigen brots. Aber wol der dae vor-
geffen doch sehen vnd clagen kan. vnseelig aber/ die auch
das vorgeffen noch darzu vorgeffen als die synlichen
sunder vñ die hoffertigen heyligen. die do satt seyn / ihene

§

mit eufferlichen/dise mit yinnerlichen gutern.

6 Meyn gebeyne ist becllyben an meinem fleysch

Vor dem geschrey meins seuffzens

Szo seer erbeyte ich yn eym seuffzenden leben/vnd wider
meyn bose natur sechte. das ich mit meer dan haut vnnnd
beyne byn wie Job sagt. Meyne gebeyne seyn anbecllebet
meiner haut. darumb wirt durch dis seuffzen mit alleyn
das leiplich vnd kurtzwerende schlucken vordstandē. sunz
dern das ganz pufende leben vnnnd erbt same casteyung
des fleischs. dan die selben erfaren wie tieff die erbt sund
vnnnd vorterbē hat die sich aber nit angreiffend. wissen
auch nit was yhnen gebuist darumb yhre gebeine clebt nit
an yrem fleisch/sundern seyn voll frisch geblute vñ safft
der natur/vnd außgefuttertes leybes. also auch am i. ps
Ich byn erbt sam gewest yn meinem seuffzen

7 Ich byn gleich wie ein pelican yn der wusten

Zie hebt an das ander leyden/wan die welt vnnnd eygens
weyßen dise erbt same vñ rewigen menschen vorfolgen/
vorachten vnd spotten. dan eyn gut leben muß auch ein
nerrisch leben sein. darumb das er sich abkeeret von allez/
da sich die andern zukeeren.

Ich byn gleich wie eine nacht eule yn den vorwuste
heuffern.

Er vorgleicht sich den eynsamen vogeln/vñ den. die am
tag nit erfur kumen. darumb das/er vorlassen wirt vnd

vorachtet/ man helt sich nit zu yhm/ mā leydet yhn auch
nit am tag. das ist yn der eer vñ rume der werlt. darumb
so ist seyn leben gleiche wie ein wusten vnd eine nacht.
Von dem pelican schreiben etlich vill eygenschafft. aber
hie heyst es ein vogell/ der yn der wusten ist/ vñnd an vns
fruchtbar steten cynsam lebend.

8 Ich hab gewacht/ vnd bynn geweest wie cyn cynsam
mer vogell yn dem dach.

Ich bynn nit entschlaffen vñnd an meyn selbs acht ges
gangen. dan die werlt schlefft als der Apostell. i. Tess. v.
Laßt vns nit schlaffen wie die andern/ sundern laßt vns
wachen vñ nüchtern seyn. dan die zeitlichen guter seynd
gegen dem ewigen gut/ gleich wie die bilde yn dez traum
gegen den rechten bilden. als auch Isa. 29. spricht das
den sundern gleich geschicht als einem durstigen trews
met dass er trinck/ vñ wen er vffwachet/ so ist noch leere
seyne seele. darüb ist diser schlaff nit anders dan die liebe
vnd anleben der creaturen. Wachen aber ist anhangen
dem ewigen gute vnd nach dem selben sehen vnd sehnen
Aber darynne ist er allein vnd niemant mit ym. dann sie
schlaffen alle. Vnd er sagt auff dem dach/ als sprecht her
die werlt ist eyn hauf. darynne sie alle schlaffen vñnd bes
schlofen ligen/ ich aber allein byn aufer dem hauf/ auff
dem dach/ noch mit ym himel/ vnd auch nit yn der werlt
die werlt hab ich vñnd der myr/ vnd den hymel vber myr.
also zwischen der werlt leben vñ dem ewigen leben / cyns
sam ym glauben schweben.

Si

9 Den gāzen tag haben mich vōsprochē mein feynd
Die myr vnd disem leben widder seyn. vnd yhn yhr selbs
leben wolgefelt/an vnderlaf. richten vnd vrteylen mich
vorwerffen vñ vorachten/mein wort vnd werck.

Vnd die mich lobeten/

Das ist/die selben feynde die mich hōnlich vnd spottlich
lobeten. dan sulchs loben ist meer dā zweyfeltig spotten/
vnd darumb helt der hebreische text also. Vnd die mich
zu narren machten.

Haben vber mich geschworen.

Das ist/sie haben sich gegen mir vōbunden vñ voreys
niget. dan vorgeiten vnd auch noch geschahen die vōs
bundung durch ein eyt/vnd heysen eydgenossen.

10 Darumb das ich die aschen geessen hab gleich wie
das broet

Nit daser aschen gessen habe/sundern die schrift nennet
das wol essen. broet. vnd vbel essen/aschen. darumb das
der frumen menschen/essen. gering. vnd nichts ist. eben
wie aschen. gegen dem essen der die ym sause vñ gnuge
des fleischs leben. ist nu der synne/meyne speys ist gleich
aschen gegen yrer speys/vñ ich doch deselb so willig
vnd gerne esse/als sie die kostlichen speyse. darumb seynd
sie mir feynde. dan sie futtern yres fleisch/vnd ich meines
castey. also seyn wir widder eynander.

Vnd meinen tranck mit weinen gemischet.

Sie trincken vnd lachen/singen/vñ seynd frolich da bey.
dā sie horē nit was got sagt. Selig seyn die do weynē/vñ
wee euch die yr nu lachet. dan nach dem fleisch fall man
ym creutz/vnd nit yn lust leben/wer recht wil leben.

11 Vor dem angesicht deyns zorns vñ vngnaden

Das ansehen des gestrengen gericht vñ zorn gottis/ vor-
treibt alle lust des fleyschs/ vñnd macht willen/ vbel zu
essen/ trincken/ vñnd ligen/ vñnd also wirt kein creutz zu
schweer. Darumb/ die do sicher seyn yn yrem leben adder
gerechtigkeit/ vor spotten diese reuige vñd demutige men-
schen/ als yn nachfolgenden psalm steet.

Darumb das du mich zurkürstet hast/ da du mich
erhaben hast/

Das ist/ darumb furcht ich mich vor deinem zorn vñnd
zurkürstet mich selb. das ich deym gericht zuuorn kñme/
dann du hast die natur an dyr/ das. wen du erhebest/ den
nyderstu/ vñd wen du gantzest/ den zubreichstu/ darumb
wee/ den/ die sich frewen yn yhrem erheben.

12 Meyne tage seyn hyngewichen wie ein schadwe.

Meyne zeit ist vorgangen vñnurze/ vñd habe nu nichts
dauon gleich wie vñ dem schadwen nichts bleybt. also
auch nichts bleybt/ von allem leben das yn fleischlicher
vñd wertlicher lust geschicht/ an wilchs leben doch nie-
mant ist/ dan das fleysch yn vns allen ist. derhalben vñs
ser aller leben eyn vñnurze leben ist/ wol dē/ der es erkennet

Vñd ich byn vordort wie das gras/

Das ist/ ynnwendig ist die seel zu nichte worden/ da das
euserlich leben grünete vñd doch vorgangen ist. Bis
hie her hat er seyne not erclagt/ vñd sich gereizet zu gote.
Tu hebet er an seyn begirde vñnd vorlangen nach dem
leben/ das yn gotte ist. als im. 62. ps. Meyn seell hat nach
dyr gedurstet vñd ruffet Christo vñ seiner gnaden.

13 Du aber/ o mein gott/ bleybest yn ewigkeit/

Ich vorgee/ vñd meine tage werden zu nichte/ darumb
Sij

Syn ich meins lebens satt/vnd begeer bey dyr zu seynn/das nichts vorgenglich ist.

Vñ deyn gedechtnis bleibt vñ einer zeit yn die andern
Das ist/gleich wie dein wese ewig bleibt/als auch bleybt
deyn name vnd gedechtnis ewig. Meine name aber geet
dohyn/mit dem wesen. als im. ix. psal. Ir gedechtnis ist
vorgangen wie ein clang / darumb mein gott wie kome
ich von myr/zu dyr/das mein wesen vnd namen auch
bleybe ewig. Ich syn leyder zu ferr vnd zu tieff von dyr.

14 Ach das du auffstüdest vñ dich erbarmest vber zion

Ich kan nit zu dir komen. darüb mein gott. stee auff/vñ
kum zu myr/vnd hole mich zu dir. Das auffsteeen bedent
die aller süßeste vnd gnedige menschwerdüg gottis/dan
do ist er kumen zu vns/auff das er vns hübe zu sich/vnd
do hat er sich erbarmet vber zion/das ist seyn volck.

Dan die zeit ist komen/das du dich yhr erbarmest
der stat zion das ist alles deins volcks.

vnd die gelegenheit ist hie.

Es ist dir nun wol gelegen vnd eben/vñ vns zeit das
du selbs komest. dan got gibt nit gnade/ es sey dan zeit/
vnd eben. Was die aber sein folget.

15 Dan deyne knecht haben beheglichen gemacht die

steyne derselben

Die steine zion/seynd die auferwelten gottis/ die selben
werden durch die propheten Aposteln/vñ prediger bereit
zu der gnaden. die bereytunge geschicht durch das wort
gottis. Wan man prediget wie das alle menschen yn vns
gnaden seynd der sund halben. vnd das niemāt an gots
tis gnaden kunne/von seyn selbs gerechtikeit besteen. als
Ro. i. Paulus sagt. das im euangelio gottis gnaden vñ

zum offenbart wirt/ Wer das horet recht/ der wirt demu-
tig vñ erschrecket/ vñ fellt gott zu fussen/ vñnd claget seyn
jamer. wie dan diser psalm than hat bis hie her. Wann
das gescheen ist. so ist's zeit vñnd eben. das got kome. der
do nit künmet/ dan zu den gedemutigeten/ Also habē alle
propheten das volck begehlich/ das ist/ demutig vñnd ges-
schiekt gemacht zur gnadē. Wiewol sie all daruber vor-
folget seyn/ von den hofertigen heiligen die yhre gerecht-
tikeit befestigen wollen allzeit.

Vñnd haben erbarmlich gemacht die erden der selben.

Das ist/ sie haben gemacht durch die selb p̄diget/ das sie
deiner barmhertikeit begreiffig seynd. vñnd Begerend der
selben. die erden Zion/ seynd die geringsten vñnder dē volck
vñnd die vñuolkomen. Also must auch Joha. baptista
mit seiner styme vor Christo künmen/ zu bereyte das volck
vñnd yre sunde zu offenbarn auff das sie der gnaden be-
durffig vñnd begerig wurden/ die aber nit sunder seyn wol-
len. den selben ist's noch nit zeit adder eben/ das sie gnade
erlangen. dan sie nemen auch die boten vñnd knechte gots
tis mit seinem wort nit auff.

16 Vñnd die heyden werden eerwirdigen deinen namen

Zie prophetirt er. dan die juden das meer teyl seynd seynd
worden der demutigen. als oben beschriben seynd. darüb
ist die gnade vñnder die heydenschaftt außgeteylet.

Vñnd alle künige der erden werden eerwirdigen deine
glory.

Das ist/ yn furcht vñnd demutiger vñnderthenikeit. werde
sie dyr dienen. dan die liebe vñnd geistlich forcht ist der re-
chte dienst gottis. an wilche andere werck vñnd opfer da
die juden vñnd hofertigen auffbawen. seynd gar nichts.

17 Dan gott hat erbawet Zion/

Das ist die stat gottis/ die heylige churstenheit/ die wirt nit

mit menschen leere ader werck geßawet. sundern mit dem
wort vnd gnaden gottis alleyn.

Vnd ist gesehen worden yn seiner glory.

Es ist nu darzukomen durch die gnedige mēschwerdūge
gottis. das der unbekentlich got. Bekennet wirt/ vnd das
alle eere/ seyn allein sey/ niemāt gerecht/ gut/ weys/ starck/
heilig/ warhafftig dan gotte alleyn/ die eere. was vorhyn
vnbekant/ do sich die menschen selb weis. gerecht. gut ze
achteten. vnd also gottis eere yhn zuschriben.

18 Er hat angesehen das geheet der ledigen.

Die eere ist gantz seyn. hatts als zu sich genomen/ vnd all
aufgelediget/ darumb die nit ledig sein wollenn. die siht
er nit an. Aber die ledigen vnd armes geistes seyn/ die ynn
stetigem durst seiner gnaden vnd gerechtikeit von ym
bitten. die siht er gnedig an/ vnd setiget sie mit yhm selbs.
als er sagt. Israel thu auff deynen mund. vnd ich selb
will das erfüllen. dan got kan nit gnade geben/ dan den
demutigen. das ist denn hungerigen/ durstigen. ledigen.
armē. sundere vñ narren. Nit siht er an die schonen wort
vnd grose werck. der reichen weysen heyligen. dan do
ist seyne eere zu nicht worden/ sundern allein das begirde
vnd geheet der die nichts haben

Vnd er hatt nit vorschmeht yhr bitten.

Gott vorschmeht nichts also seer/ als die do voll vnd
fatt seyn/ seiner gnade nit begeren die do gleich gotte et
was geben vnd grose thun. vomeynen. vnd also von
gott gelobet vnd geeret werden. meer dan got von yhn.

19 Dese dinc sollen geschriben werden yn der zukunfft
tigen zeit.

Dese dinc wirt man predigen/ schreiben/ sagen vnd ges
dencken/ nit yn disser zeit vnder dem geseze/ sundern ynn

der zeit der zeit der gnaden / ym newen testament / darüb
das diß volg diße ding nach mit begriffig ist. das do yn
seiner gerechtikeit vorblind ist.

Vnd das volck wirt got loben / das von newen ges
schaffen fall werden.

Das geistlich volck durch die tauß Christi newe geschas
ffen kan diß dinc vorstecken. Aber die noch mit seyn ander
weyt geborn / vnd mit new geschaffen ym geist vnd gna
den ist nit muglich / das sie got vnd seyne cere erkennen /
darumb kunnen sie yhn auch nit loben / sondern sich selb.
dan die loben gott. die sich schenden. die von gote nemet
vnd gote nichts geben / sie haben nichts / sondern yhr gut
ist bey gott / darumb ist auch yhr lob bey gott vnd ym
gott. vnd nit bey yhn selbs.

20 Dan got hatt herabgesehen von seinem hohen tēpel
Der heylige hohe tempel gottis. ist der gebenedeyte mensch
Ihesus Christus yn dem der ewige gott. leybhafftig gāz
lich wonet / derselb tempell ist vns gegeben zu eym ppi
tatorio. Ro. iij. das ist zu eynem throne der gnaden.
vor wilchem. wer do sich beuget der hat vorgebüg aller
sunde / vnd alle gnade. Ist nu der synne. gottis lob wirt
alleyn gepreyßet werden. dan es ist nu darzu komen. das
got der vorhyn yn vngnaden seyn augen von vns gewē
det hat. Sihet nu herab zu vns. yn aller gnaden vñ liebe
durch vnsern herren Ihesum Christū / der seyn tempel ist /
vnd sunst durch niemant darumb so nichts guts ist yr
gend. dan in Christo / so muß auch als lob schweigen
vnd allein gott in Christo gelobet werden.

Gott hat angeschawet von dem hymell die erden
das ist / die armen sunder. hatt er durch Christum ange
nomen. vnd ist der hymel vnd tempel gottis eyn ding.

Dan got gibt nichts/es muß als von Christo her komen.
Das ansehen vnd schawen gottis. ist nit anders dann ein
guediger wille zu erbamen vnd helffen/ Darumb folget

21 Auff das er erhore das seuffzen der gefangenen

Das seynd die sich erkennen wie elend sie yn sunden gefan-
gen ligen/ vnd schreyen nach der gnade der erlosung/ wie
dan oben der propheet selber than hat. dan die nit gefan-
gen seyn/das ist/die es nit sehen wie sie warhafftig gefan-
gen seyn/erhoret er nit. dan sie seuffzen nit.

Auff das er erlose die kinder der todtung

Das ist/alle die das erkne das sie seyn kindern des tods/
zorns/vnd vordampnis/ auch die do leiplich von den
andern vordampnet vn gemartert werden. dan das ist das
lob gottis/das er die vnrwürdigen ansihet vn yhn gnade
thut. die do zorn vordienet haben/als dan folget.

22 Auff das geprediget werde seyn name ym Zion.

Nit der menschen namen / dan so wirt gottis ere vnd
name gepreyhet yn der ganzen christenheit. wann man
sagt vnd weyß dass als ganz an gottis gnaden vn wir-
cken ligt/vnd wyr nichts nichts seyn.

Vnd seyn lob in Jerusalem.

Lob/name vnd ere/ein ding ist/dan wes das wesen ist.
des ist das werck. wes aber das werck ist/des ist auch bil-
lich der name. Wes der name ist/ist auch das lob. vnd
die eer des/des das lob ist.

23 Wenne zusamen komen yn eyns die volcker vnd die
kunig.

Das lob gottis yn Jerusale wirt also vn̄ dan̄ gescheen/
Wan die volcker vnd kunige. das ist ein iglich bischoff
mit seynes volck zu samen kumen yn die kirchen/das mā
gottis dienst vn̄ mes halten will. dan so pflegt man vn̄
sall predigen als der Apostel. ja Christ⁹ selb geboten hat/
das man predigen sall/vnnd sein gedencen. wan man
mes helt. darüb druct diser vers auß. die weys wie mā
gottis lob predigen sall. das ist das heilig euangelium/
darynne steet was vns gott gnaden than hatt/ darumb
er zu loben ist.

24 Er hat vnderdruckt yn der wegsart meyne craffe

Tu redet der propheet widder von yhm vnnd allen an
dern mit yhm. Gott hat meyn crafft yn dissem leben ges
demutiget vnd wydergedruckt. dann Christus reych steet
yn einem gericht. also das er seyne lieben heiligen hie ym
differ zeit manigfeltig bricht/strafft/demutiget vn̄ mar
teren lest/das sie nit cressstig vnnd starck sein auswendig/
sundern ymnewedig. Aber die werlt die er yn yhren wege/
das ist yn differ zeit/erhebet vnd stercket. wirt er an dem
ende demutigen. darumb trostet sich der propheet vnnd
das geistlich volck/das sie mit Christo zeytlich vnd yn
wege/nit am ende vnderdruckt werden.

Er hat vorkurzet meine tage/

Dan̄ er bricht abe dem alten menschen/sunderlichen aber
berurt diser vers. die heiligen merterer. dann also spricht
sanct Peter/das izūd die zeit ist/das das gericht anhebe
an gottis haus. das ist an seynen heyligen. das ende aber
wirt aufgeen an des teuffels haus.

25 Ich will sagen. Ach mein gott

Ab er mich wol bricht vnd drückt/wil ich darüß nit von
ym lauffen/sundern mecr ym yhn hoffen vnd anruffen
vnd bitten.

Nym mich nit hynn yn dem mittel meiner tage.

Das ist/laß mich nit unbereyt sterben. dan werd des lebēs
satt ist/vnd des todes begert. als Dauid vnd Abraham
vñ Paulus die werden hynghomen am ende yrer tage.
dan sie haben dem leben vrlaub geben/vñ d furdern den
tod. Die aber nach cleben an disem leben/vñ d dasselb
liebhaben/seynd noch yn dem mittel yrer tag. wie der künig
Ezechias / dise sterbē vngerne vñ tragen schwerlich
das richte vñ leyden Christi. Zu mercken dass d gemeyne
text vill anders sagt nemlich yn disen zween versen also
Er hat ym geantwortet yn dem wege seiner stercke. Die
kurtze meiner tage. thu myr kund. Nym mich nit hynn ze.
das mag also concordirt werdenn/das aufwendig vñ
derdruckt vñ d zu ym schreyend macht/den antwortet er
vñ erhoret sie yn dem weg seynrer stercke/das er sie ynwen-
dig sterckt mit seiner sterck/denn er eufferlich bucht yhre
stercke. Vnd so begeeren sie dan zu wissen die kurtz yhrer
tag / das ist/ das sie nit mit dem tod unbereyt vberylet
werden.

Deyne jar werend von einer zeit yn die andern

Das ist ewig an ende/dan Christus reych ist an ende/ja er
ist auch an anfang/wie dan folget.

26 In dem anfang hastu die erden gegrundet
vnd die hymel seyn eyn werck deiner hende

Dan Christus nach der gottheyt ist ein schepfer mit dem
vatter aller creaturen/ als der Apostel. heb. i. disen vers
cynfuet.

27 Sie werden vorwädelt werden/du aber wirst bleibē

Vnd wie ein cleyd werden sie alle vorschlißen

vnd wie ein decke wirstu sie wandeln / vñ sie werden vorwandelt werden.

Szo die hymel nit bleyben werden/vill weniger die erden darumb werden alle creature/auch die hymele vorwandelt werden nit vorgeen vnd zu nichte werden / sunder nit vornarwet.

28 Aber du bist derselbe/

du wirst nit anderer adder newer gott seyn/ als die iuden sagen werden wen sie horen werden. das du mensch gott seyest. So wollen sie furwerffen den deynen sie haben ein neuen gott/ vnd ein andern/ den der am anfang. die erde gegruendet hatt. Aber himel vnd erden mag anders werden/du bleybst yn dem selben wesen.

Vnd deyne jar werden nit ende haben/

das doch iuden vñ heyden vormeynet haben/ deyn reich bleybt/vnd deyn volck mit dyr yn ewigkeit.

29 Die kinder deiner knecht.

das seyn die von den Apostelen vnd Bischoffen ynn der churstenheit. getaufft. vnd geleert werden/dan die prelaten seyn vnser veter vnd gottis knecht.

Werden wonhafftig bleyben/

kinder seyn erben vñ bleyben/ die knecht aber/den got zeitlich lon gibt. bleyben mit ym ewigen erbe mit den kindern

Vnd yhrer samen wirt ewiglich vor dyr bereit seyn das seyn die selben kinder die glaubigen Chusti die seyn geistlicher samen vñ erbe ja mit erbe mit yhren veter vor gott ewig bereyt. wie woll vor der werlt zeitlich vorstossen.

G

Der Sechst puf psalm.

- 1 O Gott zu dyr hab ich geschryen von den tyffen
o got erhore mein geschrey
- 2 Ach das deine oren achtnehmen wolten
auff das geschrey meines bittens.
- 3 So du wilt acht haben auff die sünde O mein got
O gott wer kan dan besteen
- 4 Dan ist doch nur bey dir allein vorgebung
darumb bistu auch allein zuzufurchten.
- 5 Ich hab gottis gewartet/vñ mein seel hat gewartet
vnd auff seyn wort hab ich gebeytet.
- 6 Mein seel die ist zu gott wartend
Von der morgen wache bis widder zu der morgen
wache.
- 7 Israel der wartet zu gott/ dann die barmhertzigkeit
ist bey gott. vñ manichfeltig ist bey yhm die erlosung
- 8 Vnd er wirt erlosen Israel
auf allen seinen sünden.

1 O gott zu dyr hab ich geschryen von den tyffen

Das sein hefftige vnd seer grundlich wort eins warhafft²
tigen rewigen hertzen/das yn seynen jamer auff das aller
tyffest gekeert ist. ja nit müglich zuursteen/dan den/die
es fulen vñd erfahren. wyr seynn alle ynn tyffen grossen
elenden/aber wir fulen nit alle wo wir seynn.

Geschrey/ist nit anders/dan eyn seer stark's ernstlichs be
gyr der gnaden gottis. wilchs ynn dem menschen nit er
steet er sehe dan yn wilcher tyffe er lige.

O gott erhore mein geschrey.

- 2 Ach das doch deine oren wolten achtnehmen
auff das geschrey meins bittens

Das ist/du schweigest/vorlest/vorachtest meyn elend ges
schreye so doch niemant myr hie mag helffen / dann du
allein. darumb laß deine oren acht vñ warnemen meins
geschrey. das wort spricht die seel/wan sie empfindet das
kein creatur nit horen will yren jamer. ja auch got vñnd
alle creatur widder sie duncket streben. darumb folgt

3 So du wilt achthaben auff die sünde o gott

Das ist so du die sünd wilt vorbehalten vñnd eben dars
auff sehen vñd nit vorgeben/der du doch allein eyn gne
diger vñd mechtiger vorgeber bist/ vñd an dich niemant
kan vorgeben.

O gott. wer kan dan bleyben ader gnad warten.

Was hilffts das alle creatur myr gnedig weren/vñ mein
sünd vorachten vñd nach lieben/wan sie got achtet vñd
beheld? vñ was schadet es ob alle creature myr die sünde
auffhuben vñd behilden/wan sie gott vorlest vñd vor
achtet/das ist das der nachfolgend psalm auch sagt. o
gott gang nit ym das gericht mit deym diener dann es
wird vor dyr kein lebendiger mensch gerecht erfinden.
vñd diser vers dunckt auß wo von der psalm gemacht
ist/Nemlich von dem ansehen der gestrengen vrteyl gots
tis der so gar kein sünd ungestrafft kan vñd wil lassen.
darüb wer gottis gericht nit ansihet der furcht sich nit.
wer sich nit furcht/der schreyt nit. wer nit schreyt der find
kein gnad nit. darumb muß yn eym rechten mēschen als
zeit seyn die forcht vor dem gericht gottis/des alten men
schen halben dem gott seynd vñd widder ist/ vñd neben
derselben forcht. hoffnüg zu der gnaden vor der barm
herzikeit die der selben forcht gunstig ist vñb des newē
menschen willem/der dem alten auch seynd ist / vñnd
also mit gottis gericht eynstymmet/ Gij

also steet forcht vnd hoffnung mit eynande. vnd gleich
wie das gericht gottis wircket die furcht/also wirckt die
furcht das geschrey. geschrey aber erlanget die gnade/vñ
die weyl d alt mēsch lebt fall die furcht/das ist sein creutz
vnd todten nit auffhoren/vñ das gericht gottis nit vor-
gessen/vñ wer an das creutz vnd an forcht/vnd an gots
tis vrteyl lebt. der lebet nit recht. als von den selben im. 9.
psalm steet. Es seyn von seinen augen weg gethan deine
vrteyl. vnd spricht ich werd nymmer bewegt werden/ myr
wirt nichts vbels bescheen.

4 Dan bey dir ist allein die vorgebung

Darumb ist auch kein zuflucht zum andern/ do ymant
besteen ader bleyben mocht. dan wie sanct Paulus sagt.
Szo got vor vns ist/ wer will widder vns sein. Also.
Wer will vor vns sein/wan got widder vns ist/ dan bey
yhm allein ist die vorgebung.

Darumb bistu allein zuzurchten/

Das ist als oben gesagt ist Wer gott nit furcht/der schreyt
nit/dem wirt auch nicht vorgebē vñ darumb. das man
gottis gnade erlange. so ist er zuzurchten vnd allein zu
furchten. gleich wie er allein vorgibt/ dan wer etwas an-
ders furcht dann gott/der begert desselben andern gunst
vñ gnade/vñ fragt nit nach gott. Wer aber gott furcht
der begert seiner gnaden/vñnd fragt nit nach allem dem
das nit gott ist. dan er weyß das ym niemāt thut/so ym
got gnedig ist.

5 Ich hab gottis gewartet

Byß hie her hat er beschriben die furcht. das creutz des al-
ten menschen/wie man das tragen vnd haben fall. Vñ
beschreybt er die hoffnung/das leben des neuen mensche
wie man sich darynne haben fall. dann dise zwey stuck
ym allenn psalmen ja ym der ganzen heylgen schrifft

gelernet werden. dan gott ist so wunderlich ynn seynen
kindern. das er sie gleich ynn widder vñ vncynigen dingē
selig macht. dan hoffēūg vñ vorzweyffeln seyn widder
eynāder. Nach mußē sie yn dē vorzweyffeln hoffen. dā
furcht ist nit andere/dā ein anhebēdes vorzweyffeln. vñ
hoffēūg cyn anhebēdes genesen/vñ die zwey widdernat
turlich ding müssen yn vns seyn. darūb das zwey wid
dernaturlich menschen yn vns seyn/der alt/vñ der new/
der alt muß furchten vnd vorzagen vñ vndergehen.
der new muß hoffen. bestē. vñ erhebt werden. vnd diß
beyde yn einem menschen. ja yn einem werck zu gleich bes
scheen. gleich wie ein bildmacher. eben yn dem er weg nym
met vnd harwet/was am holtz zum bilde nit fall/ yn dez
furdert er auch die form des bildes. Also yn der furcht die
den alten Adam abherwet. wechset die hoffnung die den
newen menschen formet. Darumb spricht er. Ich hab
gottis gewartet. das ist yn dißem geschrey. vñ creutz/ byn
ich nit zu ruck lauffen adder vorzweyffelt. Sondern gots
tis gnaden / die ich begert hab. der harre ich/ vnd warte.
wen es meym gott gefelt/ myr zu helffen. Nun seyn etlich
die wollen gote das zill/ weyß/ zeit vnd maß legen. vnd
gleich ynn selbs vorzschlahen wie sie yhn holffen haben
wollen. vñ wans yhn nit so widderferet/ vorzagen sie/
addere so sie mügē anderweyt/ hulffe suchen/ Diffe haren
nit/ sie warten gottis nit. Gott soll yr warten vñd als
bald bereyt seyn. vñ nit anders helffen/ dan wie sie es ab
malet haben. die aber gottis wartē. die bitten gnad. aber
sie stellen es frey. zu gottis gutem willen. wenn. wie/ wo/
vnd durch was er yhn hulffe. An der hulffe zweyfflen sie
sie nit. Sie geben yr aber auch kein namen nit/ Sie lassen
sie gott teuffen vñd nennen/ vñd solt es auch lange an
maß vorzogen werden. Wer aber der hulffe einen namen
gibt/ dem wirt sie nit/ dann er wartet vñd leydet gottis
radt/ willen/ vnd vorzihen nit.

Vnd meyn seel hat gewartet/

G iij

Das ist/meyn seel ist ein wartendes ader harrendes ding
wurden. als sprech er. Aller meiner seel wesen vnd leben
ist nit anders gewesen/dan cyn bloß warten vnd gottis
harren/das mocht auff latein also sagen. Sustinui do-
mini. Sustentrix seu expectatrix fuit anima mea. Lynn
harrerynne ist worden mein seel. Auszudrucken ein festes
stetiges harren vñ harri/yn wilchem die seel nichts emp-
findet/dan das sie harret/adder wartet/als im. 39. psalm.
Harrend hab ich gehard des herren. also hie auch Ich
hab gottis also vest gehart/das mein seel ein harrerynne
wurden ist. nu gleich yr leben ein harren/hoffen/warten
ganz ist.

Vnd auff seyn wort hab ich mich vorlasen adder
gebeytet

Das ist auff seyn vorheysen vñ gelubd/ das ist nu die nas-
tur des innerwendigen vnd newen menschen/ das er cyn
stetes harren/hoffen/trawen/glauben treyt zu gott. dar-
umb lest yn auch gott mit. der do vorheysen hat gnad vñ
hulffe/allen den die ym trawen vñ sich auff yn vorlasen
vnd seyn harren. vnd dasselb wort vñ vorheysen gottis/
ist der ganze enthalt des newen menschen/der lebt nit vñ
dem b. oet sundern von dem selben wort gottis

6 Meyn seel zu got (s. wartet) von der morgen wache
bis widder zu der morgen wache/

Das ist mein seel/steet gerichtts angesichts allzeit zu gott
auff vnd festlich wartet seiner zukunfft vnd hulff. als im
12. psalm Unser augen seyn stetig zu vnserm got/bis dz
er sich vnser erbarne. Die schrifft teylet die nacht ym
vier teyll. vnd nennet die teill der nacht wachung adder
wartung. Gleich wie die statt hütter des nachtes/hüten/
wachen/vnd warten ab ymant come adder gebe. Lynn
iglich wache hat 3. stund. die erst von 6 bis zu 9. die aus-
der von 9 zu 12. die drit von 12 zu 3. die vierde/ das ist die
morgen wach. von 3. zum tage/das ist zu .6. Tyffe

auflegung laß wir izt farenn ist gnug gesagt / das von
einem morgen bis zum andern gottis zu harren ist / das
ist stetlich vñ nie abezulassen. Ab gott auch vortzihen
wolt denn ganzen tag. sollen wir auch bis auff den ans
dern tag warten. Das er aber die morgen wach ader zeit
anzeigt / meer vñ die abent ader mittnacht wache.
Ist die vsach. dan des morgens hebt man alle werck an /
vñ endet sie des abents vñ ruget des nachts. Will er
nun sagen hebst du an in gott zu trawē / so hore nit wid
der auff / laß den abent vñ nacht geen / bleyb du in der
warte steen bis widder morgen. dan der new mensch des
werck nit anders ist dan gottis warten vñ seyn harren /
fall nit auffhoren / wie der euser mēsch thut vñ thū muß
vñ das ist das leben yn den hohen dreyn tugenden. als
glauben hoffnung / liebe / Wilcher tugent art vñ natur
in den psalmen wirt beschriben .i. affectus et opera eorū.
darumb ist ym disem. cleynen psalm / das gantz leben /
werck / vñ wandell / des ynnwendigen menschen / gar
meysterlich beschriben / das es nit anders sey dan ein vor
lassen yn gott / vñ gantz gottis willen gelassen steen.

7 Israel der wartet gottis

Das ist / alls was geistlich vñ innerwendig new volg ist /
das steet also / als gesagt ist / das seyn gantz leben ist ein
trawen / vorlassen. warten / harren auff got / dann Israel
auff hebreisch heist ein man der gott sieht / ad der der vor
gott ist richtig / das seyn die der hertzenn richtig steen zu
gott / vñ auff yhn alzeit sehen. achthaben / warnemen /
vñ nit sich krūmen yn sich selb / dann directus cum deo
ad der directus dei seu deo / heist einer der do richtig ist zu
gott. darumb wartet niemant gottis / dann die do recht
Israel seyn d / das seyn die richtigen gottis. das seyn aber
die gott sehen durch ein starcken glauben / hoffnung vñ
liebe.

Dan barmhertzekeit ist bey gote /

Den die seyn warten vñ Israel seynd / Israel der richtige
mensch leufft nit zu ym selber. nit yn seyne stercke / nit yn
seine gerechtikeit vnd weysheit / dan die seyn nit Israel
sundern krum yn sich selb / vnd vnrichtig. dan hulff vnd
gnade ist nit bey yhn selb sie seyn sunder vnd vordampft
bey ym als er auch durch Oseam sagt. O Israel Bey
dyr ist nichts dan vordanis. bey mir aber ist deyn hulff.
das weysf Israel nu wol / das bey ym selb / zorn / vngnad
sind vnd jamer ist / als er oben beschreyt vnd clagt hat.
darumb leufft er von ym selb / vnd leufft zu got. bey dem
ist gnad / heyl / gerechtikeit / vnd nit auß vordinst.

Vnd vill ist bey ym die erlosung

Das ist / bey ym ist alleyn die erlosung auß den vilen ty-
ffen da von oben gesagt ist / vnd sunst kein erlosung. wie
wol die hoffertigen bey yn selbs / wollen / gnugtung vnd
erlosung findenn mit yren wercken. sich er auß erbeyten /
yrselbs helffer. erloser / erbarmen seyn / vnd yhn selbs war-
heit. gerechtikeit erwerben. aber was folget yn disen be-
schluß.

8 Vnd er wirt Israel erlosen

auß allem seynen sünden.

Er er gott sie selb / vñ mit selb / wirt erlosen Israel. die rich-
tigen / die yhn sehen vñ kennen / warten / trawen zc. Merck
Israel hatt sinde / vñ kan ym selb nit helffen. Was nimpt
Moab vnd Ismael vñ sich / die hoffertigen heilgen / die
do nit wollen wissen / das gerechtikeit do wir von recht
seynn sollen / ist nit anders dan ein gnedige gabe der lau-
teren vnuordineten barmhertikeit gottis. darumb sol-
len wir vns selb nit barmhertzig / sondern ernst vñ zornig
seyn. auß das vns gott barmhertzig sey / vnd nit zornig /
dan wer ym selb will gnedig seyn / dem wirt gott vngne-
dig / vnd wer ym selb vngnedig ist / dem ist gott gnedig.

Der Sieben pufpsalm.

- 1 Ach Gott erhore mein gebeet/ Nyn zu deyn oren
mein flehen yn deiner warheit/ erhore mich yn deiner
gerechtigkeit.
- 2 Vnd gang nit mit deym diener ynß gericht
Dan es mag vor deyn augen nit rechtsfertig seyn/
ymand der do lebe.
- 3 Dan mein feynd hatt meyn seel vorfolget. er hat
ernydert meyn leben bis auff die erden.
- 4 Er hatt mich hyngelegt yn die finsternis
gleich wie die todten disser werlt
- 5 Vnd bekümert ist worden yn mir mein geyst
Meyn hertz ist yn myr betruht worden
- 6 Ich hab gedacht der alten tagen/ ich hab gepredigee
von allen deinen wercken/ vnd von den geschefften
deiner hende hab ich geleret.
- 7 Ich hab mein hend außgerectt zu dir
Meyn seel ist zu dir gleich wie ein durre erden.
- 8 Schnell erhore mich mein gott/ mein geyst ist matt
worden.
- 9 Wend nit von mir deyn antlitz
das ich nit gleich werde den die yn die helle faren
- 10 Laf myr gehort werden früe deine barmhertzikeit
dan mein hoffnung ist yn dyr.
- 11 Lerne mich erkennen den weg darynne ich wandeen
fall/ dan mein seel hab ich erhaben zu dyr
- 12 Erlöse mich mein got von meinen feynden/ zu dyr
ist mein zuflucht/ Lerne mich thun was dir wolge-
fellet/ dan du bist mein gott
- 13 Deyn guter geyst sure mich yn den richtigent weg
ymb deins namens willen/ O gott mach mich lebēs
dig in deiner gerechtikeit.
- 14 Sure auß der voruolgunng meine seel
vnd yn deiner gnaden zursture meine feynde
- 15 Vnd vorvuste alle die meine seel ansechtende
dan ich byn deyn diener.

Alle psalmen/alle schrifft rufft nach der gnaden/preyffet
die gnade/sucht Christi/ vnd allein gottis werck lobet/
aller mēschen werck aber vorwirfft sie. darumb ist diser
psalm leicht zumo:steen auß den vorigen. dan es ist alls
eyne stymme. Ist zu wissen das diser psalm geredet ist
vnd wirt / yn der person des ganzen volcks Christi/ vnd
eyns iglichē besunder/wilchs volcks teglich seynd seynd/
die werltweyßen vnd eygen rechtfertigen/die nit wissen
noch wifen wollen von gottis gnaden. ja sie meyne
niemāt halt meer von gottis gnaden dan sie/ yn blinder
heylickeit vnd guter meinūg irrthum vorfirt.

1 Ach gott erhör mein geheet.

Eyns heiligen menschen leben steet meer ynn nemen von
got/dan in geben/meer in begeren dan yn haben/meer yn
frum werden dan ynn frum sein. als S. Aug. spricht/das
der glaub erwirbet was das gesetz furdert / darumb ist.
bitten/begeren/suchen das rechte wesen eins inwendigen
menschen. als im 32. psalm. die do got altzeit suchen den
wirt nicht guts mangeln. vñ im. ciiij. Suchet sein antlitz
altzeit. Widerüb am 12. ps. von den hoffertigen heiligen
Es ist niemāt der do got suchte/ dā sie habēs gar fundē.

Hym zu deyn oren mein flehen in deiner warheit/

Nit yn meiner warheit/dan die ist ein itelkeit vñ falscheit

Erhore mich in deiner gerechtikeit/

Nit in meiner gerechtikeit/ dan dieselb ist sund vnd vn-
gerechtikeit. Als sprech er. Mach mich auß gnadē wars
hafftig vñ gerecht/dan ich sehe etlich die durch yre eygen
warheit vnd gerechtikeit war vnd recht haben vñ seyn
wollen. do behut du mich fur. Sie wollenn yhe auch etz
was seyn/so sie doch nichts sein. eytel sein. lugener seyn/
toren sein/sunder sein. Wie ist zu mercken/das das wort

leyen deyn warheit vnd dein gerechtikeit mit heyst/die/do
got mit war vnd gerecht ist/als etlich vill meinen/ sun-
dern die gnad da mit vns gott warhafftig macht vnd
gerecht durch Christu / wie da Apostolus Paulus Ro. 1
vnd 2 vnd 3. nennet die gerechtikeit gottis vnd warheit
gottis die vns durch dem glauben Christi geben wirt.
Auch heyst gottis warheit hie mit die wort allein/ ja meer
die werck vnd erfullug seyner wort. wilch erfullug ist die
selb gnade vnd barmhertzikeit/ vnd gleich wie ein zall-
pfennig ader gemalter gulde nit ein warhafftiger gulde
ist. sondern ein figur. ja ein eytell vnd trigerey / so sie vor
ware gulden gebenvn gehalten werden. Ein recht gulde
aber ist die warheit vnd an trigerey. also aller hoffertis-
gen heiligen/ leben vn werck. vn gerechtikeit ist gegen der
gerechtikeit vn werck der gnaden gottis ein bloßer schein
vn ein todtliche schedliche falscheit/ so sie vor recht ware
gehalten werde/ da ist nit warheit/ sondern gottis ist sie/
der die rechten grundgute gerechtikeit gibit/ wilch ist der
glaub Christi. darumb mag das wort leyen warheit auß
hebreisch auch wol (in fide tui) das ist in deinem glaube
vorwandelt werden.

2 Vnd gang nit mit deym diener ins gericht

Szo der diener gottis der doch anzweyffel ym gnaden
ist nit mag besteenvor dem gericht/ sondern flucht zu der
barmhertzikeit. Wo wollen die feynde vnd sunder bley-
ben? ja wo wollen auch die hoffertigen bleyben die mit
blinder vornessenheit yhrer wercke vnd gutem. lebenn/
vordinsten/ lon/ vnd gunst vnd danck bey gottis gerech-
tikeit finden vorneynen. Gottis gericht nit yn den gu-
ten wercken auch furchten/ sondern allein yn den bosenn/
gerade als wysseten sie was gut vnd bos vor gottis ge-
richt bey yhn gesehen werde.

¶ Dan es mag vor deynen augen nicht rechtfertig bes-
steen ymant der do lebet/

als sprech er. vor meinen vnd der menschen augen mag
ich rechtfertig besteen. aber vor dyr ist niemant rechtfer-
tig der do lebet. Wer aber todt ist/der ist gerechtfertigt. als
Ro. 8. Wer gestorbe ist/der ist von sunden gerechtfertiget
Wilcher tod hebet an ym püß leben vnd weret byß ynß
grab. wie er spricht psal. 48. Wir werden teglich getodet
vmb deinen willen.

3 ¶ Dan mein feynd hat vorfolget mein seel/

das ist. Meyne feynde die mir durch yhre weyßheit vnd
gerechtigkeit alzeit widder steen. als ein iglicher Abel hat
sein Cayn/vnd Isaac seinen Ismael. Jacob sein Esau/
vñ Christus seinen Juda. der ym. widder seyn seel strebe/
sunderlich yn den dingen die die seel anlangen. das ist yn
der warheit vnd gerechtigkeit/ do die hofferigen nit wol-
len leyden/das yhr warheit vnd gerechtigkeit nichts sey.
vnd derhalben vorfolgen die rechtsrümmenmenschen die
in gottis warheit vnd gerechtigkeit allein leben.

¶ Er hat ernydert mein leben bis auff die erden/

das ist/sie leben in eeren/vnd sitzen hoch. steygen empor
vor der menschen augen vmb yhrs scheines willenn. der
halb muß ich gantz ernydert werden/vor der menschen
augen vorworffen vnd vorachtet/dan yn disen worten
wil der propheet außdrucken wie ein vorachtet ding sey.
eyn mensch der yn der gnaden vnd in Christo lebet/ den
eeret niemant/ ja yderman vneeret yhn/vnd ist gantz ein
vnnutz/vntuchtig/schedlich mensch angesehen zu allen
sachen die die menschen handeln. vñ wilchem es dartzu
nach nit kumen ist/vñ sulche feynd nach nit hat. die alle
seyne gute werck/wort/rad. meinüg. vor narheit bosheit
vnd vntugent halten. der ist nach nit recht zu Christo

kümen/es sey dan/dass er selb seyn seynd werde vnd ym
selb anlege das ym die andern solten anlegen. sich selb yn
allen guten worten/wercken/leben/vnmutz vñ narre ach-
te vnd grundlich an alls betrigen seins hertzen erkenne.

4 Er hatt mich ynß finsternis geleyet

Gleich wie die toden diser werlt.

Das ist/sie seyn ym licht vnd den leuten bekant vnd berü-
met/scheynen vñ seyn angenehm/mich aber legt er gantz
yn eyn vorachtung/vnd yns vnanschen gleich wie ein
todter der vor der werlt nym erscheynet. also hat er auch
doben gesagt. Ich byn gleich wordē wie ein nacht rabe/
wie ein cynsammer vogel ynn der wusten. also geet es. der
frumen bedarff man zu keynē leben vñ ampt. auch dar-
zu so gedenckt man yhr nit/man will yhr auch nit wis-
sen adder erkennen/die scheynenden aber heylgen/gasset
ein yder an.

5 Vnd bekümert ist worden ynn myr mein geyst

Mein hertz ist yn mir betrübt worden.

Das ist/das recht opffer das gotte wolgefellet. als oben
ym 4. psalm gesagt/ Wan ein seel trostlos ist von allen
creaturen/auch von yr selb vorlassen vñ vomolget. also
das sie nichts dan bloß/lauter gottis gnadē wartet/das
seynn die seligen die do weynen/dann sie sollen getrostet
werden.

6 Ich hab gedacht der alten tagen/

Das ist/die scheynenden die erhoet seyn vnd ym licht der
menschen. gleytzen nit bekümert nach betrübt seyn. habē
yren trost vñ freud yn kegewertigen wandel vñ wercken
yhrer eygen stercke. weisheit. gerechtikeit durffen gottis
nit. Ich aber der diser ding ganz arm bynn/weysß keyn
ander trost/dan das ich dencke wie gott alle seyne heyls

h

gen/vorzeyten auch hatt lasen mangelen/ vnd nach nie
keinen durch seyne eygen werck/mügen/wissen/frumkeit
Behaltē als im 43. O gott wyr haben gehört/ vnser veter
haben vns gesagt/das werck das du vorzeyten ynn yren
tagen hast getan/wie du hast ausgetriben vñ geschlagē
die heyden/das du sie ynn yr land setzest/dan vorwar nit
mit yrem schwert/haben sie das land besessen vñd yhre
crafft hat yhn nit geholffen/sunderm deyne crafft vñd
deyns angesichts gnedigs erluchten/ darumb das dyrs
so wolgefallen hat/vnd nit sie vordienet haben.

Ich hab meyn beschawen gehabt ynn allen deinen
wercken.

Das ist der menschen werck vñ wort wie sie ymmer gles
zen vñd lieben der werlt/hab ich nit geachtet/dann ich
weyß das sie niemant selig machen/nach nutze seyn/dan
alleyn zu falscher eytler eere. Sunderm aller trost/hulff
vñ selickeyt ligt gantz an deinen wercken allein. wann du
vnser wercke thuest vñ vnser wercke/mit vnser sunder dein
seyn. so seyn sie dir angenhm/recht/ware/vnd gut. Dise
aber deiner gnaden wercke erkennen nit/die yres liches/
yhrer stercke/yhrer weyßheit wercke thun vnd groß ach
ten. Das er aber sagt ynn allen deynen wercken/so doch
vntzelig seyn gottis werck/ist so zuuorsteen/das die wer
cke da mit er sich bekümert sollen alle gottis seyn/vñ will
gar nit eins menschen wercke preysen. dann kein werck
eyns menschen/sunderm allein gottis werck seyn ettwas.
darumb beschribet er ynn disen Worten gar eben die art
der gnaden/gegen die art der natur. Itē das wortley
meditabar/das hie beschawē/ist geteutsch/heyst offte yn
der schrifft predigen ader reden. als psal. 36. der müd des
gerechtfertigen wirt bedēcken (das ist bedechtig vñ weyß
lich predigen) die weyßheit. Dan von disem predigen der
gottis werck vñ gnaden entspringt der gantz hadder vñ
vornolgen von der er oben geclagt hatt/das die hoßers
tigen nit ynn gottis gnaden vñ wercken/sunderm ynn yr

eygen wercken helffen/raten vnd vormügen. sich lasen/
das seyn yhre gedancken.

Vnd von den geschafften deiner hende hab ich geleret
das ist/ich hab yhn gesagt vñ sie eyndenckend gemacht
deyner hend werck. das sie nit yhre werck groß achteten/
das hatt sie aber vordrosen vñ myr darumb seynd wor-
den. Die geschaffte der hende gottis/das seynd die frömen
die er gebirt vnd schaffet auß gnaden / das geschicht an
alle yhre mit wircken. dann so seyn vnd werden sie new
creatures in Christo. Die werck aber seynd/ das thun vñ
leydē das got durch sie also geschaffen/ wircket. da seyn
sie mitwircker. das seynn die zweyerley werck gottis. da
auch psalm. 27. von sagt. Sie haben nit vorkunden die
werck gottis. nach die geschaffte seyner hende etc. Itē ps
18. die hymel predigen die eere gottis vnd das firmament
vorkündet die werck seyner hende. das ist/ die Apostell pres-
digen alleyn vñ der gerechtigkeit die got yn vnß wircket/
vnd gar nit die gerechtigkeit/die die menschen vormügen
zu wircken.

7 Ich hab meyn hend auffgereckt zu dyr/

das ist/ die weil es so ist/ dass an deyn wircken vñ gna-
den ligt. so thu ich billich nit mehr/dan such nur gnadē
vñ nimmmer auff meyn thun sicher sey. wie meyn seynde
thun/die yhre hend zu dyr nit recken/ ja sie yn den busen
stecken vnd von dyr nichts begeren/ sondern woll gefals-
len yn yhn selbs haben. Hend auffrecken zu got/bedeut
gebet zu got (geistlich aber) das alle vnser werck gote
sollen zu geschriben werden.

Mein seel ist zu dyr/gleich wie eyn durre erden

Gleich wie eyn durrer acker durstet nach dem regen. als
so durstet meyn seel nach deyner gnaden. als im. 62. ps
Mein seel hat nach dyr gedurstet/vñ das geschicht auß

hij

dem erkentnis das alle werck am gottis gnaden nichts
seyn/das diehoffertigen mit gleuben. darumb steen yre ge
dancken. wort vnd leer yn yren wercken/ vnd ganz satt
seyn. nicht nach gnaden dursten/ nach die hend zu gote
auffheben/ yhr leben dückt sie recht. eben. gnugsam seyn.

8 Eylend erhore mich o gott/meyn geist ist machtlos
worden.

Wie oben gesagt ist. eyn trostlos seel die nichts ynn sich
findet die ist gott das libst opffer/ sunderlich wan sie zu
seiner gnadē schreyt. dan got nit libers hort/dan geschrey
vnd durst nach seiner barmhertzigkeit/ den durst. mag
aber nit haben der ynn yhm findet vill gutis lebens/ vnd
gleich gottis gericht nit furchtet. Tu spricht er. Ich hab
gedurst vñ nach gnaden vorlanget. also lange bis das
ich nymer kann/ich bym harrens ganz müde darumb
ists zeit. kñme nu eylend vnd erhore mich schnell/ das ist
vns zur lere gesagt das wyr gottis gnaden langmutig
lich warten sollen/ vnd nit vorzweyffeln ab er vorzihen
wille.

9 Wend nit von myr dein angesicht das ich nit gleich

werd den die ynn die helle faren

Das macht der auffzug gottlicher gnaden vñ hilff das
die seel sorget sie sey vorlassen vnd vordampt. so doch
darumb sie also gespannt wirt das sie yhe mehr vnd
grundlicher gnade begeer vnd also yhe volkomelicher
gnade empfahe. Das ist nu ein christformig warhafftig
mēsche der innerwendig voll vntrosts vñ betrubte geistes
ist/ yn stetigem vorlangen gottis gnaden vñ hulffe. Vnd
doch wen er sulchs creutz den andern auch sagen wil/ vñ
sie leren. nit allein keyn mitleyden ader folge/ sondern vns
dāck vñ has vordienet/ vñ also auswendig vñ ynnwē
dig mit Christo gecreuziget wirt. dan die hoffertigē steen
yn yhrer vormessenheit das sie gleich seyn den/die gen hys
mell faren sulche furcht der hellen vnd der gnaden darst
haben sie nit.

10 Las myr frue gehört werden deyn barmhertigkeit/
das ist als oben ym 1. Gib meinez gehoer freud vñ trost/
las mich horen dein gnade die yn mein hertze spreche/ dir
seyn vorgeben deine sünde. Also redet gott/ den fride ym
das hertz seyns volcks. Vnd das frue/ das ist eylend/ vor-
zeng nit. dan ich byn müde vñ kan nymer harren.

Dan mein hoffnung ist yn dir/

Las dich das bewegen das ich kein andern trost suche
dan dich allein/ das ist gar ein gross dinc/ ym leyden nit
hulffe suchen von yrgend einem mēschen ader creaturen/
sundern sich drucken vnd auß leyden yn gottis hoffnung
demutige hulffe warten. der sein wenig auff erden.

11 Lerne mich den weg darynne ich wandeln soll/

Als oben im. 2. psalm gesagt ist. Ich will dir vorstand
geben vñnd dich vnderweyßen in dem weg darynne du
wandeln salt/ dan es ist nit möglich das der mensch sich
selbs füre in seinem leben/ vrsach ist die. dan er muß blind
werden vñnd gote sich lasen yn richtigem glauben. der
glaub aber sibet nichts/ sondern ist der finster weg da vñ
ps. 17. finsterniß ist vñnder seinen füssen. darumb seyns
pferd vnd meuler die der vornunfft licht folgen vñnd nit
weyter. dann also ferne es sieselb recht/ gotlich vñnd gut
duncket. Was aber anderst sie ansibet (als im glauben)
da fliehen sie von.

Dan ich mein seel auffhaben zu dyr/

Das ist/ ich byn bereyt vber geben gelassen yn deinen will-
len/ dan die kan gott geleren vñnd füren/ die yhr seel yhn
vberantworten vnd opffern vñ sich füren lasen. die aber
yhre seel ym sich zihen vñnd vorbergen/ kan er nit füren.
darumb ist zu wissen/ dass das wort/ seel auffhaben zu
gotte/ ist die seel opffern/ dann die opffer ym gesetz hñb

vñ

mann empot: gegen gotte. ist nu der synne/ich opffer dyr
mit silber ad/golt/noch kelber nach schaff/ sundern meyn
hertz vnd mein seel/die du allein vor deyn opffer achtest/
wie dan puerb. 23 prebe fili cor tuum mihi. Son gib mir
dein hertz/das hertz/den grund/den will got haben. Also
psal. 118. Anima mea in manibus meis semper. Meyn
seel erbiere ich dir altzeit/hab sie stete in meinē henden/das
ist/ich gebe dir sie altzeit vber / vnd steck sie mit yn meinen
busen/ Der vers ist ein also groß geheet aber gar nutz-
lich das ein mensch mag zu seyn gott sprechen. Sehe
hyn/nym hyn mein hertz/vnd sure du mich nach deinem
willen ich las mich dyr genzlich.

12 Erlöse mich von meinen feyn den mein got

Das ist die weysen vñ heylgen das sie mich mit vberwun-
den vñ von dyr zu sich zihen. als ps. 18. Wan die fremb-
den mein mit vbermechtig werden/so wird ich reyn bley-
ben. dā wie vorge sagt / der frūmen vorvolger/suchē nur
wie sie dieselben vorseuren vnd zu sich reysen in yren weg
der sie allein recht dunckt. vnd darumb ist gottis hüt vñ
hulffe not das sie besteen mugen in dem vorseuren/ als
die iuden den aposteln tetten/die doch mit allem sturmē
mit anders suchten/dan wie sie yhre wege vnd weis nah
dem gesetz bestetigeteten vñ die christen zu yhn brechten
mit gewalt.

Zu dir ist mein zufflucht/lerne mich thun was dyr

wol gefellet/

Mein feynd die durffen nit dein/nach deiner leere. darūb
fliehen sie nit zu dir/ja sie leren vñ sagen mir was ich thū
sall/vnd wollen aller meister sein. ist aber eytel falsche fas-
bullen/darumb behut mich vor yhn vnd erlöse mich vñ
yhn/vñ sey du mein meister selbs. also ps. 119. O gote
erlöse meine seel vñ den triglichen lippen(das ist) falschē

leeren vnd listigen zungen/die vnder der gestalt der warheit lernen den irrthum. der prediger auch heute vber vill seynd in der christenheit wenig die den grund predigen.

Dan du bist mein gott/

Das ist / ich mach myr nit ein abgot auß meiner weysheit vnd gerechtikeit/als mein seynd thun/ sondern ich halt mich an deine gnade/ vnd nehme von dir weisheit vñ gerechtikeit/die do yn dir ist vnd ewig bleybet.

13 Deyn guter geist füre mich yn dem richtigen wege

Las nit gescheen das sie mich füren/ader yhe ein mensch dan sie füren krüme wege/vñnd deyn geist der bose füret sie. Ist zu mercken das beyde geiste gottis seyn/der gute vñ der bose. den bose gibt got den hoffertigē/ als vñ Saul geschriben steet das der bose geist gottis regiret yhn/das ist der zornige vnmutige geist. da mit sie yhre recht vnd warheit vorfechten vñnd die guten vorfolgen / als auch Ro. x. Gott hat yn geben den geist des hasses vñ zorns. Der gute geist ist der heylge geist/der macht sanfft/gelinde/vñ gutig hertzen/die geen yn dem richtigen weg. dar ynne sie nichts dann gotte suchen vnd nit sichs selbs ynit allen dingen.

Ach mein gott/vmb deins namens willen mach lebendig in deiner gerechtikeit

Das ist das deyn namē geeret werde/der wirt aber geeret/wan bekennet wirt/das er das leben vñ gerechtikeit gibt auß gnaden an vordinst/dan so kan man dann sagen. Gott ist gutig. gnedig/barmhertzig/ das seynd seyn namen die zu preysen seynn. die eygen gerechtfertigen aber eeren yheselbs namen. Sie wollen auch lebendig seyn yn yhrer gerechtikeit. darumb achten sie nit gottis gerechtikeit/die er auß gnaden dem sinder gibt/vñnd also lebendig

beding macht yn seyner gegeben gerechticheit yn der war
heyt. darüb spricht er nit. Gib myr lon vor mein gerecht
ticheit / sundern mach mich lebendig yn deiner gerechtis
cheit / vnd so fall ein izlicher chriſten beeten / der anders
recht chriſten / Wiſſend iſt / das eußerlich gerechticheit
yn wercken lauter trigerey iſt.

14 Für auf der voruolung mein ſeel /

Nit allein bitt er behalten vor ſeyn feynden den groſſ ges
rechten / sundern auch endlich von yhn außgefurt zu wer
den / dan wie wol die frumen vnder den feynden behalten
werden / ſeynd ſie aber doch nach vnder yhn gleich gefan
gen / biß das / adder ſie außgefurt / adder die ſeynd befert
werden / vnd frund werden.

Vnd yn deiner barmherticheit vorſtore mein feynde.

Das iſt umb deiner barmherticheit vnd gnaden willen /
das die ſelb gepreyſet werde vnd erkant / wilchem preyß
vnd erkentnis alzeit vnd ſer widder ſeyn / meyn feynde
die yhre gerechticheit preyßen vñ weyßheit rümen.

15 Vnd mach zu nichte alle die mein ſeel anſechtend.

Das ſeyn die ſelben eygendunckler / die der gerechten ſeelen
ſuchen zu ſehen yn yren ſtrick vnd yrrthum. als ps. 123.
der ſtrick iſt zu brochen / vnd wir ſeynd erloſt. darumb
hat das hebreiſch (als ſ. Hiero. helt) alle die mein ſeel bin
den adder ſehen.

Dan ich byn deyn diener.


Das iſt / yn gnaden lebe ich vnd darumb alle mein leben
dienet dyr / vnd nicht myr / dan ich ſuche nit mich / sun
dern dich vñ das deine. das kunnen aber nit thun / die yn
yrer gerechticheit leben. sundern ſie dienen yhn ſelbs. ſuchē
das yhr ynn allen dingen.

Nocht ymand zu myr sagen. Kanstu nit meer dann nur von menschen gerechticheit/weyßheyt vnd stercke sagen/ ymmer von gottis gerechticheit vnd gnaden die schrifft außlegen/vñ also nit meer dan auff einer seyten lyren vñ nur ein lidleyn singen. Antwort ich. Seh eyn iglicher auff sich. das beken ich vor mich. als offt ich weniger yn der schrifft dan Christu funden hab/byn ich nach nie sat wurden. Als offt aber ich meer dan Christu funden hab. byn ich nie armer wurde. das mich auch das war dücke/ das gott der heilig geist nit meer weyß nach wissen wil/ dan Ihesus Christu/ als er sagt von dem selben. Er wirt mich vercleren/ Er wirt nichts von ym selb reden/ sunder von dem meynen wirt ers nemen vñnd euch verkunden. Christus ist gottis gnaden. barmhertzicheit. gerechticheit warheit/weißheit/stercke/trost vnd selickeyt vns vō gott gegeben/an allen vordineft. Christus sag ich/nit (als etlich nit blinden worten sagen) causaliter. das er gerechticheit gebe vñnd bleybe er drauffen. dan die ist tod. ja sie ist nymmer gegebē Christussey dan selbs auch da/gleich wie die glantz der sonnen/vñnd hize des feurs ist nit/wo die sonne vnd das feur nit ist.

Nun seynd etlich den dise wort der gnaden also leycht geachtet seyn vñnd sprechen vormeßlich. Wer weyß das nit. dass an gnaden nihets guts yn vns ist/vñnd haltens darfur/das sie es fast woll vorsteen. ja meer/ so man sie fragt. ab sie yre gerechticheit nichts achtent/faren sie schwind herauf vnd sagen. eya das byn ich gewyß/ das ist ein jemerliche schwere blindheit. dass sie sich yn dem hohen grade der volkōmenheit achten vñnd nach nit denn vndersten vorstanden nach geschmactt haben. dan wie kan ein mensch hoffertiger seyn / dan wer do sagen thar/ er sey reyn von aller hoffart/vñnd aller bosen neygung. dan die geisteiche hoffart ist das letzte vñnd aller tyffeste laster so sie doch nach nit sich reyn finden von fleischlicher vnd menschlicher neygung. darumb hatt nie kein

heylge so küne gewesen das er vō ym selb sagete/das seyne
weisheit vnd gerechtikeit vor ym nichts sey/sundern im
hadder lygen sie vñ mit ym selbs vber den dingen streytē
So künen dan dise aber mit eynem trieglichem wort.
ja die neygung ist aber nit todsunde/vnnd haltens aber
darfur das sie nit blind seynn/sundern woll wissen was
teglich adder todsund sey/vñ fast yn derselben blindheit
Christo nach seynem richtstul greyssen. dann war ist es
das teglich sund nit vordammen/seynd aber von natur
keyn teglich funde/dan alleyn dem sie gott auß gnaden/
teglich achtet/das thut er aber nur den/die sie nit vorachs
ten. darumb ist gar feerlich zu reden von teglichen suns
den/so mā darauf sicherheit empfaben wil/vñ falschen
trost/der do widder gottis furcht strebet/vnd gottis ges
richt gar heymlich vorachten leeret. dan so der mensch
von einē iglichen mußigen wort fall rechēschafft geben
am jungsten tag/wer will so küne seynn / das er tegliche
sunde nit mit furchten hüten adder berweynen wolle/vnd
also ym demutiger furcht/nach guade vnd barmhertze
ikeyt sich ernstlich sehnen.

Gedruckt zu Wittenbergk yn der Chürfürstlichen stad
durch Joannem Gumenbergk Nach Christ
geburt Tausent funffhundert vnd im
sibentzen jar.
Bey den Augustinern.



Faint, illegible text at the top of the page, possibly bleed-through from the reverse side.



Faint, illegible text at the bottom of the page, possibly bleed-through from the reverse side.



740 1/2

AB 71 B $\frac{2}{i, 12}$

ULB Halle

3

003 081 834



sb.





